



尚書考註異(二)考





尚書考異

(二)

梅鷟著

叢書集成初編

(補印本)

尙書攷異及其他一種

二 冊

一九三七年五月初版
一九五九年十月補印

商務印書館出版

上海大眾文化印刷廠印刷

尙書考異卷第五

周官。

此篇因周禮一書。劉歆欲與古文尙書同立學官。而河間獻王所得止五篇。冬官雖亡。不知其實。蓋散亂於五官之中。實未全亡。顧乃取考工記以補冬官之缺。東晉時人窺見此意。特作周官一篇。以示後世。使知冬官不亡之意。又見三公三孤與三公三少相當。而無當於六官。故首言公孤以示後人。使知公孤無定位。無專職。乃六卿兼官之意。其後戒勅之語。不過故爲訓體。而欲人默識此意於言語文字之外。此其作書之本意也。不然則冢宰掌邦治以下五條。皆依傍周禮原文。獨司空一條。改作掌邦土云云。以示人皆紊入司徒一官之中。所當取出易置之意哉。雖然。晉人知其一。不知其二。堯典司徒之職。敬敷五教而已。而大雅乃召司徒縮板以載。則周之先王。蓋又使之董治宮室者矣。況孤位雖當公之下。然遍考經中。殊無三孤之效。則直以當古之三少。吾亦未敢以爲必然也。其辨詳見於後。

惟周公撫萬邦。巡侯甸。四征弗庭。綏厥兆民。六服羣辟。罔不承德。歸于宗周。董正治官。

蔡仲之命及此篇。皆惟周公發端。置成王於何地哉。程子曰。周公之功固大矣。然亦臣子之分所當爲。昭乎哉言也。以周公而撫萬邦。巡侯甸。四征不庭。綏厥兆民。亦若舜攝位之事。不知周公初未嘗承王命。汝陟帝位之言。亦未嘗有受終文祖之事。一旦而卽行帝舜攝位之所爲。則其餘不足觀也已。武王崩。流言

興公避居東土三年。則吾聞之矣。曰巡狩侯甸者。此妄說也。作詩貽王。迎公以歸。奉王命大誥于征伐殷。蠱其後。命魯公伐淮夷。則吾讀之矣。曰四征不庭者。又妄說也。六服與周禮九服不同也。近者先承德也。宗周鎬京也。歸者周公歸也。董正治事之六官。孔穎達曰。周制無萬國。惟伐淮夷。非四征大言之耳。按古文周官云。惟周王而鸞言。惟周公蓋據誤本也。

王曰。若昔大猷。制治于未亂。保邦于未危。

詩惟大猷是經。老子曰。爲之於未有。治之於未亂。易曰。危者有其安者也。其亡其亡。係于苞桑。

唐虞稽古。建官惟百。內有百揆四岳。外有州牧侯伯。庶政惟和。萬國咸寧。夏商官儉。亦克用乂。明王立政。不惟其官。惟其人。

堯典曰。若稽古。又曰。允釐百工。孔安國傳。工。官。又平章百姓。孔安國傳。亦曰。百姓。百官。可見建官惟百之言。與孔傳脗合。而古文與傳同出於一人之手無疑也。於是大禹謨亦曰。率百官若帝之初。堯典納于百揆。四岳曰。否德忝帝位。咨十有二牧。又曰。日覲四岳羣后。班瑞于羣后。巡狩。肆覲。東后。南后。西后。北后。五載之後。羣后四朝。而不言百官也。是其官亦不但以百計矣。而以百工百姓之言。遂以惟百爲唐虞建百之數。論特未定。非成王周公之言。殆東晉人之言也。堯典庶績咸熙。易萬國咸寧。夏商官倍。謂二官也。亦無明文。禹會諸侯於塗山。執玉帛者萬國。康誥乃非德用乂。今文有立政篇。文王世子。惟其人。

今予小子。祇勤于德。夙夜不逮。仰惟前代。時若訓迪厥官。

金滕。予小子新命于先王。多方云。祇告爾命。又克勤乃事。呂刑。以教祇德。又曰。罔不惟德之勤。無逸。非天攸若。梓材。王啓監盤庚。汝罔能迪。又曰。迪高后。

立太師太傅太保。茲惟三公。論道經邦。變理陰陽。官不必備。惟其人。少師少傅少保曰三孤。貳公宏化。寅亮天地。弼予一人。

周禮。司服。王爲三公六卿錫衰。公之服。自袞冕而下。如王之服。孤之服。自希冕而下。如子男之服。卿大夫之服。自元冕而下。如孤之服。典命。王之三公八命。卿六命。大夫四命。公之孤四命。巾車。孤乘夏篆。卿乘夏縵。大夫乘墨車。司常。王建太常。諸侯建旂。孤卿建旌。大夫士建物。射人。掌國之三公孤卿大夫之位。三公北面。孤東面。卿大夫西面。其摯。三公執璧。孤執皮帛。卿執羔。大夫鴈。孤卿大夫以三耦。相孤卿大夫之灋。儀。司士。三公北面。東上。孤東面。北上。卿大夫西面。北上。孤卿特揖。太僕。掌三公孤卿之弔勞。王不眡朝。則辭於三公及孤卿。弁師。及孤卿大夫之冕。小司寇。三公及州長百姓北面朝。士左。九棘。孤卿大夫位焉。面三槐。三公位焉。賈子曰。昔者成王幼。在緦抱之中。召公爲太保。周公爲太傅。太公爲太師。保保其身體。傅傅之德義。師道之教訓。此三公之職也。於是爲置三少。皆上大夫也。曰少保。少傅。少師。是與太子宴者也。故迺孩提有識。三公三少固明孝仁禮義以道習之。文王世子曰。太傅審父子君臣之道以示之。少傅奉世子以觀太傅之德行而審諭之。太傅在前。少傅在後。入則有保。出則有師。是以教諭而德成也。師也者。教之以事而喻諸德者也。保也者。慎其身以輔翼之而諭諸道者也。記曰。虞夏商周有師保。有疑丞。設四

輔及三公不必備。惟其人。今按周禮孤廁於三公之下。卿大夫之上。而無三孤之數。賈子有三公三少之數。而非三孤之稱。今太師太傅太保曰三公。少師少傅少保曰三孤。則正用賈生保傅之篇。而特改三少之少字。當周禮之孤字耳。蓋周官一篇。全是約周禮一書而成之。周禮三公及孤無定位。無專職。乃六卿之兼官也。故周公召公皆以太師太保兼領冢宰。延及宣王之世。王命卿士太師皇父猶率舊也。蓋得其人可以兼則兼之。不得其人不可以兼則直虛其位。不輕任也。故周禮一書於公孤不言所掌。不詳所統。因服位儀等而偶道及之耳。作古文者亦窺見此意。故首爲周禮分疏。以三公三孤先言之於六卿之上。其義如此。王制鄭注三公之田三。又曰三爲三孤之田。則三公三孤蓋用鄭注也。考工記坐而論道。冢宰以經邦國。陳平曰宰相上佐天子。制陰陽。順四時。王制鄭氏注云三孤之田不副者以其無職。佐公論道耳。班固燕然山銘曰寅亮聖明。登翼王室。納于大麓。惟清緝熙。大禹謨以弼五教。

冢宰掌邦治統百官均四海

孔穎達曰此經言六卿所掌之事撮引周禮爲之總目。或據禮文。或取禮意。雖言有小意。義皆不殊。周禮云乃立天官冢宰使帥其屬而掌邦治以佐王均邦國。治官之屬大宰卿一人。六典一曰治典以經邦國以治官府以紀萬民。馬融云冢大也。宰治也。大治者兼萬事之名也。鄭元云變冢言大進退異名也。百官總焉則謂之冢。列職於王則稱大冢者大之上也。山頂曰冢是解冢大異名之意。大宰職云三曰禮典以統百官。馬融云統本也。百官是宗伯之事也。此統百官在冢宰之下。當以冢尊。故統治百官爲冢宰之事。

治官禮官俱得統之也。周禮云：以佐王均邦國。此言均四海。故傳辨之。均平四海之內。邦國與孔意不異。按所引尚書正義非元文。常用已意增竄之也。以下各條放此。今按孔穎達首數語。深得晉人作書本意。蔡沈所不及。

司徒掌邦教。敷五典。擾兆民。

正義曰：周禮云：乃立地官司徒。使帥其屬而掌邦教。以佐王安擾邦國。大宰職云：二曰教典。以安邦國。以教官府。以擾萬民。鄭元云：擾亦安也。言饒衍之。傳亦以擾爲安。五典卽五教也。布五常之教。以安和天下之人民。使大小協睦也。舜典云：契爲司徒。敬敷五教。周禮司徒掌十有二教。一曰：以祀禮教敬。則民不苟。二曰：以陽禮教讓。則民不爭。三曰：以陰禮教親。則民不怨。四曰：以樂禮教和。則民不乖。五曰：以儀辨等。則民不越。六曰：以俗教安。則民不偷。七曰：以刑教中。則民不暴。八曰：以誓教恤。則民不怠。九曰：以度教節。則民知足。十曰：以世事教能。則民不失職。十有一曰：以賢制爵。則民慎德。十有二曰：以庸制祿。則民興功。鄭元云：有虞氏五。而周十有二焉。然則十有二細分五教。爲之五教。可以常行。謂之五典。五典謂父義、母慈、兄友、弟恭、子孝也。

宗伯掌邦禮。治神人。和上下。

正義曰：周禮云：乃立春官宗伯。使帥其屬而掌邦禮。以佐王和邦國。宗廟也。伯。長也。宗廟官之長。故名其官爲宗伯。其職云：掌建邦之天神人鬼地祇之禮。又主吉凶賓軍嘉之五禮。吉禮之別十有二。凶禮之別有五。賓禮之別有八。軍禮之別有五。嘉禮之別有六。總之有三十六禮。皆在宗伯職掌之文。文煩不可具。

載大宰職云。三曰禮典。以和邦國。以統百官。以諧萬民。其職又有以玉作六瑞。以等邦國。以禽作六贊。以等諸臣。是以和上下。尊卑等列也。

司馬掌邦政。統六師。平邦國。

正義曰。周禮云。乃立夏官司馬。使帥其屬而掌邦政。以佐王平邦國。大宰職云。四曰政典。以平邦國。以正百官。以均萬民。其職主戎馬之事。有掌征伐。統正六軍。正治王邦四方國之亂者。天子六軍。軍師之通名也。按其職。掌九伐之濃。馮弱犯寡。則皆之。賊賢害民。則伐之。暴內陵外。則壇之。野荒民散。則削之。負固不服。則侵之。賊殺其親。則正之。放弑其君。則殘之。犯令陵政。則杜之。內外亂。鳥獸行。則滅之。

司寇掌邦禁。詰姦慝。刑暴亂。

正義曰。周禮云。乃立秋官司寇。使帥其屬而掌邦禁。以佐王刑邦國。其職云。刑邦國。詰四方。大宰職云。五曰刑典。以詰邦國。以刑百官。以糾萬民。馬融云。詰。猶窮也。窮四方之姦也。孔以詰爲治。是主寇賊法禁。治姦慝之人。刑殺其強暴作亂者。夏官主征伐。秋官主刑殺。征伐亦殺人。而官屬異時者。夏司馬討惡。助夏一時之長物。秋司寇刑姦。順秋時之殺物也。周禮云。掌邦刑。此云。掌邦禁者。避下刑暴亂之文。故云。掌邦禁。司空掌邦土。居四民。時地利。

正義曰。周禮冬官亡。今補之曰。乃立冬官司空。使帥其屬而掌邦事。以佐王富邦國。按此增竄廿四字非小宰職云。六曰冬官。掌邦事。又云。六曰事職。以富邦國。以養萬民。馬融云。事職。掌百工器用。耒耜弓車之屬。與此主

土居民全不相當。冬官既亡，不知其本。禮記王制記司空之事云：量地以制邑，度地以居民，足明冬官本有主土居民之事也。齊語云：管仲制法令，士農工商四民不雜，卽此居民使順天時，分地利，授之士也。土則地利爲之名，以其吐生百穀，故曰土也。周禮云事此云土者，爲下有居四民，故云土以居民爲急故也。愚按古文改宗伯之統百官入冢宰，其意蓋以百官惟天官得以統之，而不知惟禮可以爲國。古人又曰：禮之立國，與天命敵，故聯屬總統。正宗伯之職也。若冢宰之治官府，則統之之意已在其中矣。況經於天官地官獨以官府異之，宗伯以下，方皆言百官，晉人不知精微之義，誠妄改也。司寇亦改邦國百官萬民，而曰詰姦慝，刑暴亂者，以見明慎用獄之意，不淫刑以逞也。殊不知流放竄極，皆在朝之臣列也。弄兵潢池，皆萬民之赤子也。姦慝暴亂，謂非吾之百官兆民之不職者，而何於此見聖人之作周禮，有下車泣罪之誼，有反躬自責之仁，而僞書之妄改者，不過申韓之慘覈，張杜之深文耳，可不戒哉。司空不曰邦事，而曰邦土，曰居四民，時地利者，其意欲蒐其紊於司徒者，而復還之於司空之篇也。孔疏以爲出於王制，取諸管氏書者得之。其曰四民之居，明是出於管子之書無疑。然不知周之先公先王命官之制，其所沿革，大抵多與古昔有不盡同，如乃召司空，其繩則直而召之也，乃召司徒，縮板以載而召之也，柰何欲以虞之五教，改易周之十二教，又謂司徒之官職專教民者哉。所謂知其一不知其二者也。

六卿分職，各率其屬，以倡九牧，阜成兆民。

周禮曰：設官分職，又使帥其屬以佐王。今變之曰：以倡九牧，南風之歌，可以阜吾民之財。

六年五服一朝。又六年王乃時巡。考制度于四岳。諸侯各朝于方岳。大明黜陟。

大行人周制十有二歲。王巡狩。殷國時巡者。又用舜典春東夏南。秋冬北之時也。考制度于四岳。如虞帝巡狩然也。頌曰。敷天之下。哀時之對。又曰。式序在位。薄言震之。莫不震疊。

王曰。嗚呼。凡我有官君子。欽乃攸司。慎乃出令。令出惟行。弗惟反。以公滅私。民其允懷。

酒誥庶士有正。越庶伯君子。泰誓又云。我西土君子。詩敬爾在公。漢書劉向傳。上封事引易曰。渙汗其大號。言號令如汗。汗出而不反者也。今出善令。未能踰時而反。是反汗也。又曰。出令則如反汗。用賢則如轉石。去佞則如拔山。後漢書胡廣傳。政令惟汗。往而不反。文六年。史駢曰。以私害公。漢書賈捐之薦楊興曰。狗公絕私。則尹翁歸。

學古入官。議事以制。政乃不迷。其爾典常作之師。無以利口亂厥官。蓄疑敗謀。怠忽荒政。不學牆面。莅事惟煩。

論語好古敏以求之。襄三十一年。子產曰。僑聞學而後入政。此五句用其意。昭六年。叔向曰。昔先生議事以制。不爲刑辟。此句匪略也。因有先王二字故也。所謂蒐羅已甚者也。秦始皇本紀。事不師古。孟子作之師。論語惡利口之覆邦家者。小不忍則亂大謀。孟子及是時。明其政刑。又及是時。盤樂怠敖。論語不爲周南召南。其猶正牆面而立。說命禮煩則亂。

戒爾卿士。功崇惟志。業廣惟勤。惟克果斷。乃罔後艱。

詩皇父卿士。漢光武云。有志者事竟成。老子曰。勤而行之。易曰。所以崇德而廣業也。古語斷而必行。鬼神避之。詩無有後艱。

位不期驕。祿不期侈。恭儉惟德。無載爾僞。作德心逸日休。作僞心勞日拙。

戰國策。平原君引公子牟與應侯曰。貴不與富期而富至。富不與梁肉期而梁肉至。梁肉不與驕奢期而驕奢至。驕奢不與死亡期而死亡至。累世以前。坐此者多矣。孟子曰。侮奪人之君。惡得爲恭儉。恭儉豈可以聲音笑貌爲哉。約二書之旨。以成辭。誠亦妙矣。哉。襄三十年。君子曰。詩曰。淑慎爾止。無載爾僞。信之謂也。杜注。逸詩。晉人見詩無此二句。遂攘取以爲書。作德承恭儉言。作僞承聲音笑貌僞爲之恭儉言。孟子言恭則能以禮接下。不驕也。儉則取民有制。不侈也。禮接下取有制。則心逸而日見休美矣。實驕而僞爲不驕。實侈而僞爲不侈。蓋遮籠絡。其心焦然不寧。則日見其拙敗矣。老子曰。吾有三寶。二曰儉。三曰不敢爲天下先。儉故能廣。不敢爲天下先。故能成器長。

居寵思危。罔不惟畏。弗畏入畏。

老子富貴而驕。自貽其咎。又曰。寵爲下。得之若驚。又曰。侯王無以貴高。將恐蹙。其句法有曰。多易必多難。聖人猶難之。故終無難。又聖人不病。以其病。病是以不病。一則以三難字牽連用之。一則以四病字牽連用之。老子之句法多如是。而此亦以三畏字牽連用之。二畏一句。又見呂刑。雖畏勿畏。

推賢讓能。庶官乃和。不和政厖。

劉向封事曰。舜命九官。濟濟相讓。和之至也。衆賢和於朝。則萬物和於野。又曰。雜選衆賢。罔不肅和。崇推讓之風。以銷分爭之訟。又曰。此皆不和賢不肖易位之所致也。左傳。狐突曰。服其身。則衣之純。虺涼冬殺。梁餘子養曰。不獲而虺。命可知矣。

舉能其官。惟爾之能。稱匪其人。惟爾不任。

荀子仲尼篇曰。擅寵於萬乘之國。必無後患之術。莫若好同之。援賢博施除怨。而無妨害之。能耐任之。則慎行此道。能而不耐任。且恐失寵。則莫若早同之。推賢讓能。而安隨其後。如有寵則必榮。失寵則必無罪。是事君者之寶。而必無後患之術也。故知者之舉事也。滿則慮謙。平則慮險。安則慮危。上文罔後艱。即無後患之謂。按周官全是節寫荀卿此章。

王曰。嗚呼。三事暨大夫。敬爾有官。亂爾有政。以佑乃辟。永康兆民。萬邦惟無斁。

詩。三事大夫。今用詩人之言。而增暨字於其間。蓋以三事兼言三公三孤之事也。大夫者。上大夫六卿也。蔡傳以爲卽立政之三事者非也。豈有近舍公孤而遠及於立政任人準夫牧之三事邪。且六卿分職。均舉。而至此則單舉任人準夫牧。亦非文體矣。蓋蔡沈徒知三事之出於立政。而不知三事大夫一句。則全取諸詩。而非取諸立政。則思慮豈不到此哉。先入之說爲主。故蔽綱而不悟耳。顧命曰。其能而亂四方。洛誥。亂爲四方新辟。詩。以佐戎辟。今改佐爲佑。改佐爲乃。文侯之命。永綏在位。惠康小民。今改惠爲永。改小爲兆。中庸。近之則不厭。詩。在此無斁。

君陳

鄭康成云。君陳。周公之子。不知何所據。鄭公博極羣書。必有據也。果如此言。則君陳以子繼周公之後。而畢公以叔父繼君陳之後。其序紊矣。

惟爾令德。孝恭惟孝。友于兄弟。克施有政。命汝尹茲東郊。敬哉。

國語。單襄公曰。晉襄公曰。驩此其孫也。而令德孝恭。非此其誰。論語。書曰。孝乎惟孝。友于兄弟。施于有政。今作克族。左定四年。祝佗謂萇宏曰。以尹天下。臯陶謨。敬哉有士。

昔周公師保萬民。民懷其德。往慎乃司。茲率厥常。懋昭周公之訓。惟民其乂。

襄十四年。劉定公曰。昔伯舅太公。右我先王。股肱周室。師保萬民。世昨太師。以表東海。今余命爾環。茲率舅氏之典。纂乃祖考。毋忝乃舊。敬之哉。毋廢朕命。茲率。卽左傳茲率字。但易典字爲厥常。酒誥。聰聽祖考之彝訓。康誥。用康乂民。堯典。有能俾乂。

我聞曰。至治馨香。感于神明。黍稷非馨。明德惟馨。爾尙式時。周公之猷訓。惟日孜孜。無敢逸豫。

呂刑曰。罔有馨香。德刑發聞。惟腥。大禹謨曰。至誠感神。僖五年。宮之奇言周書。又曰。黍稷匪馨。明德惟馨。其上文曰。鬼神非人實親。惟德是依。下文曰。若晉取虞。而明德以薦馨香。神其吐之乎。卽至治馨香。感于神明之謂。然則其所謂我聞者。曷聞也。聞諸宮之奇而已。湯誓。爾尙輔予一人。多方。爾尙宅爾宅。君牙又曰。乃惟由先正。舊典時式。君奭。我式克。至于今日。休臯陶謨。予思日孜孜。康誥。無康好逸豫。

凡人未見聖。若不克見。既見聖。亦不克由聖。爾其戒哉。爾惟風。下民惟草。

緇衣。君陳云。未見聖。若已弗克見。既見聖。亦不克由聖。鄭氏曰。克。能也。由。用也。尙書無己字。論語。君子之德。風。小人之德。草。草上之風。必偃。孔子。聖人也。豈有不引書云。而攘以爲己吐哉。以此觀之。一節之中。但爾其戒哉一句。乃晉人杜撰。以承上接下。餘皆蒐與襲。

圖厥政。莫或不艱。有廢有興。出入自爾師虞。庶言同。則釋。

老子曰。圖難於其易。緇衣。君陳曰。出入自爾師虞。庶言同。無則釋二字。孟子。國人皆曰賢。然後察之。國人皆曰可殺。然後察之。則釋之謂也。論語。釋之爲貴。立政。克由釋之。

爾有嘉謀嘉猷。則入告爾后于內。爾乃順之于外。曰。斯謀斯猷。惟我后之德。嗚呼。臣人咸若時。惟良顯哉。

坊記。子云。善則稱君。過則稱己。則民作忠。君陳曰。爾有嘉謀嘉猷。則入告爾君于內。女乃順之于外。曰。此謀此猷。惟我君之德。於乎。是惟良顯哉。但后字皆作君。斯字作此。無臣人咸若時一句。而末句增是字。陶謨。咸若時。惟帝其難之。

王君。君陳。爾惟宏周公丕訓。無依勢作威。無倚法以削。寬而有制。從容以和。

篇內凡言周公訓者三。唐誥。宏于天。又乃服。惟宏王。洪範曰。無有作威。荀子曰。寬而不慢。左傳曰。政寬則民慢。慢則濟之以猛。立政。率惟謀。從容德。

殷民在辟。予曰辟。爾惟勿辟。予曰宥。爾惟勿宥。惟厥中。

禮文王世子有司讞于公。其死罪則曰某之罪在大辟。其刑罪則曰某之罪在小辟。公曰宥之。有司又曰在辟。公又曰宥之。有司又曰在辟。及三宥不對走出。呂刑士制百姓于刑之中。又故乃明于刑之中。惟良折獄罔非在中。

有弗若于汝政。弗化于汝訓。辟以止辟。乃辟。

無逸。非天攸若。又曰非民攸訓。左傳五典克從。無違教也。史記成康之世。刑措不用四十餘年。又三字接連。句法擬老子。

狃于姦宄。敗常亂俗。三細不宥。

堯典寇賊姦宄。左傳以亂天常。太甲欲敗度。縱敗禮。微子用亂敗厥德于下。王制一道德以同俗。康誥乃惟終自作不典。式爾有厥罪小。乃不可不殺。

爾無忿疾于頑。無求備于一夫。

周禮司刺一宥曰不識。三赦曰蠢愚。多士予惟率肆矜爾。非予罪。又曰爾乃尙有爾士。爾乃尙寧幹止。又爾厥有幹有年于茲洛。爾小子乃興從爾遷。多方曰自作不和。爾惟和哉。爾室不睦。爾惟和哉。是皆無忿疾之意。然未嘗目之曰頑也。目之曰頑者。古文而已。周語富辰曰。今以小忿棄之。先正亦說其目爲頑民之非有辨。周公謂魯公曰。無求備于一人。今改人爲夫。

必有忍。其乃有濟。有容德乃大。

周語。富辰曰。書有之曰。必有忍也。若能有濟也。注。若。乃也。孔子曰。小不忍則亂大謀。左傳。魯以能忍爲國。忍其大。不忍其小。何居。又古語。忍之少時。福祿無期。又曰。忍事敵災星。又曰。忍過事堪喜。洪裕寬綽。足以有容。德之大也。褊狹固滯。其德貶矣。

簡厥修。亦簡其或不修。進厥良。以率其或不良。

王制。修六禮以節民性。一道德以同俗。上賢以崇德。簡不肖以絀惡。命鄉簡不帥教者。又曰。大樂正論造士之賢者。以言于司馬。曰。進士。司馬辨論官材。論進士之賢者。以告于王。

惟民生厚。因物有遷。違上所命。從厥攸好。爾克敬典在德。時乃罔不變。允升于大猷。惟予一人膺受多福。其爾之休。終有辭於永世。

成公十六年。申叔時曰。民生厚而德正。孟子曰。人少則慕父母。知好色則慕少艾。有妻子則慕妻子。仕則慕君。大學曰。其所令。反其所好。而民不從。君奭。其汝克敬德。康誥。汝亦罔不克敬典。勿替敬典。王制。命鄉簡不帥教者。以告。不變。右鄉移之左。左鄉移之右。不變。移之郊之遂。屏之遠方。易曰。允升大吉。詩。匪大猷。是經。盤庚。惟予一人有佚罰。古祝詞。膺受多福。呂刑。鱗寡有辭于苗。

畢命。

史記。康王命作策。畢公分居里成周郊。作畢命。

惟十有二年六月庚午。朏。越三日壬申。王朝步自宗周。至于豐。以成周之衆。命畢公保釐東郊。

漢律歷志云。康王畢命。豐刑曰。惟十有二年六月庚午。朏。王命作策書。豐刑。洪範。惟十有三祀。召誥。越若來。三月惟丙午。朏。越三日戊申。又上文云。王朝步自周。則至于豐。蔡沈曰。此僞作者傳聞舊語。得其年月。不得以下之辭。妄言作豐刑耳。不知豐刑之言何所道也。今按蔡氏謂豐刑爲僞作者似矣。然謂僞作者傳聞得其年月。不得以下之辭。何所據而知之哉。愚則以爲豐刑先漢之僞書。畢命東晉之僞書。僞畢命者。以豐刑之年月。可以欺人而用之。其下文未妥而修改之云耳。

嗚呼。父師。惟文王武王。敷大德于天下。用克受殷命。

微子。父師。洛誥。禪于文王武王。大誥。敷前人受命。顧命。昔君文王武王。易天地之大德。日生。詩。敷天之下。其句法。蓋擬酒誥。明大命于妹邦。君奭。惟時受有殷命哉。多方。簡畀殷命。尹爾多方。然周稱太師太保。未見有同殷稱父師者。

惟周公左右先生。綏定厥家。毖殷頑民。遷于洛邑。密邇王室。式化厥訓。既歷三紀。世變風移。四方無虞。予一人以寧。

襄十四年。劉定公曰。昔伯舅太公。右我先王。改作左右字。而君陳篇內。又用其師保萬民一句。又用茲率字。詩。綏萬邦。克定厥家。洛誥。佻來毖殷。大誥。天亦惟用勤。毖我民。又無毖于恤。又天闔。毖我成功。所。詩。予其懲而毖後患。僞作書者。以後患指殷頑民也。多士。予惟時其遷居西爾。又曰。今朕作大邑于茲洛。又今

爾惟時宅爾邑。繼爾居。爾厥有幹。有年于茲。洛爾小子。乃興從爾遷。此于洛之事也。商書密邇桐宮。周本紀。武王曰。毋遠天室。多士又曰。移爾遐逝。君陳弗化于汝訓。今云。式化厥訓。成王初立時。已遷般民。至康十二年。方命畢公。亦不止三紀矣。世變風移。四方無虞。言般民不叛也。詩。王心載寧。皇明文衡。載國初先正。有辨頑民之說。

道有升降。政由俗革。不臧厥臧。民罔攸勸。

襄二十九年。叔向曰。宋之樂。其以宋升降乎。檀弓。子思曰。道隆則從而隆。道污則從而污。益之損之。與時宜之。論語。舉善則勸。

惟公懋德。克勤小物。弼亮四世。正色率下。罔不祇師言。嘉績多于先王。予小子垂拱仰成。

商書古文。方懋厥德。晉語。知伯國曰。夫君子能勤小物。故無大患。淮南子。道應訓。武王之佐五人。許慎注。謂周公。召公。太公。畢公。毛公也。武王於五者不能一事焉。然而垂拱受成功焉。善乘人之資也。公羊傳。孔父正色而立。于朝。周官。又云。寅亮天地。弼予一人。四世兼文王之世言之。左傳。予嘉乃績。

王曰。嗚呼。父師。今予祇命公。以周公之事。往哉。

襄十四年。劉定公曰。今予命女環。下文弗率訓典。又變茲率。舅氏之典。堯典曰。往哉。

旌別淑慝。表厥宅里。彰善癉惡。樹之風聲。弗率訓典。殊厥井疆。俾克思慕。申畫郊圻。慎固封守。以康四海。

君陳畢命二篇。乃因多士多方等篇。故有毖殷遷洛之云。而洛誥有周公在洛惟七年。故君陳有懋昭周公之訓。爾尙式時周公之猷訓。爾惟宏周公丕訓。今畢命又言祇命公以周公之事。緇衣曰。有國者章善。黜惡以示民厚。則民情不貳。又曰。故君民者。章好以示民俗。慎惡以御民之淫。則民不惑矣。表記。先王諡以尊名。節以壹惠。恥名之浮於行也。故君子不自大其事。不自尙其功。以求處情。過行弗率。以求處厚。彰人一善而美人之功。以求下賢。旌淑卽章好之謂。別慝卽慎惡之謂。表其宅里。如鄭康成後世稱之通德里之類。左傳。文六年。君子曰。並建聖哲。樹之風聲。又曰。告之訓典。不用過行。弗率。而用弗率訓典。蓋訓典在尙書當用。而過行二字。恐踵者得之也。季孫葬昭公於塋外。仲尼溝而一之。此殊井疆於死者也。命鄉簡不帥教者。移之左右。移之郊遂。此殊井疆使不得與善者雜處也。畏爲惡之禍。慕爲善之福。皆勸民之政也。左傳。大國一圻。卽王畿之畿也。王畿翼翼。四方之極。則四海康矣。

政貴有恆。辭尙書要。不惟好異。商俗靡靡。利口惟賢。餘風未殄。公其念哉。

論語。人而無恆。不可以作巫醫。易曰。不恆其德。論語。辭達而已矣。尙體要則不華霏矣。畏政不純久。異言非體要。漢書。張釋之曰。今以畜夫口辨而超遷之。臣恐天下隨風靡爭口辨。無其實。餘風尙存。所當化誨也。

世祿之家。鮮克由禮。以蕩陵德。實悖天道。敝化奢麗。萬世同流。

孟子。仕者世祿。禮記。隆禮由禮。謂之君子。論語。今之狂也。蕩國語。蔑有德。昭二十年。叔孫昭子曰。然則戴

桓也。汰侈無禮已甚。亂所在也。晉語叔向曰：桓子驕泰奢侈，貪欲無藝，略則行志，假貸居賄，卻昭子恃其富寵以泰於國，其寵大矣。一朝而滅，莫之哀也。惟無德也。晉語叔孫穆子曰：此之謂世祿，非不朽也。左莊二十四年御孫曰：儉德之共也。侈惡之大也。左傳天道遠，孟子天地同流。

茲殷庶士，席寵惟舊，怙侈滅義，服美于人，驕淫矜侈，將由惡終。雖收放心，閑之惟艱。

因周公誥殷多士之篇，故言殷庶士庶士，卽多士也。舊卽舊染汚俗之舊。昭元年子產對叔向曰：子哲無禮而好陵人，怙富而卑其下。前此徐吾犯之妹美，子哲盛飾入布帛而出。又子哲疾，子產數之曰：人誰不死，凶人不終命也。襄二十七年慶封之車美，叔孫行服美不稱，必以惡終。美車何爲？二十八年叔孫穆子曰：善人富謂之賞，淫人富謂之殃。天其殃之也。其將聚而殲旃。又石碻曰：驕奢淫佚，所自邪也。四者之來，寵祿過也。孟子曰：仁，人心也。義，人路也。繼之曰：放其心而不知求，舍其路而弗由，哀哉。言人知心之爲心，不知仁之爲心，故名仁爲人心，使人知仁之切於日用，不可須臾放也。今放仁而不知求，是卽放其心而不知求矣。人知路之爲路，不知義之爲路，故名義爲人路，使人知義之切於所行，而不可須臾舍也。今舍義而弗由，是卽舍路而弗由矣。豈不可哀之甚哉。蓋放心者，放仁之喻。猶舍路者，舍義之喻。匪卽以心爲仁也。若卽以心爲仁，是猶卽以路爲義也。以譬喻爲理可乎哉。以喻爲理尙不可，況直指譬喻爲真，而忘其爲喻。文理不貫而前後舛錯，其爲不可也明矣。孟子下文又曰：人有雞犬放，則知求之，有放心而不知求者，亦接上文放仁而言也。言仁猶心之切，匪若雞犬爲外物之比。知求外物之雞犬，而不知求切身

之仁。不知輕甚之類甚矣。又曰：學問之道無他，求其放心而已矣。亦承上文言求放心而已矣。匪直以譬喻爲真，而卽謂之求放心也。若以喻爲真，而卽以爲求放心，則文理不貫。前後舛錯矣。古人之文，非若後人之對仗。下文止言求放心，而不復言由正路者，省文也。言此則彼可以類推矣。是亦曰：人有舍路而不由者，學問之道無他，由其舍路而已矣。是一貫也。豈可以譬喻爲真，而卽謂之由舍路哉。作僞書者，肆攘無鑿，巧於蓋遮。至此則忘孟子之上文，而獨剽賊其下文放心二字。又於孟子前篇閑先聖之道，下文亦有正人心之說，又剽賊閑之一字，綴以惟艱云。由是後世大儒，雖英雄豪傑之士，亦爲其所蔽，綱皆以爲眞求放心，遂使孟夫子文辭前後乖刺，分爲兩截。此不亦不善攘書兩截者之過也哉。或曰：吾子言孟子之文不容兩截，是也。遂以古尙書爲攘。孟子恐未必然也。然則吾子果何所據，而決知其出於孟子而不善攘哉。曰：其所攘者不一而止也。曰：稽於衆，舍己從人。曰：不虐無告。曰：朕宅帝位三十有三載。曰：耄期倦于勤。曰：惟茲臣庶，罔或于予。正曰：罰弗及嗣，賞延于世。曰：好生之德，洽于民心。曰：可愛非君，可畏非民。曰：萬姓仇予。曰：鬱陶乎予心。顏厚有忸怩。曰：成湯放桀，曰：坐以待旦。曰：營于桐宮。曰：王徂桐宮。曰：任官惟賢，才曰：匹夫匹婦，不獲自盡。曰：說築傅巖之野。曰：無恥過作非。曰：監于先生成憲，其永無愆。曰：予弗克俾厥后，惟堯舜。其心愧恥，若撻于市。一夫不獲，則曰：時予之辜。曰：元后作民父母。曰：罪人以族。官人以世。曰：厥監惟不遠。在彼夏王。曰：獨夫受。曰：大告武成。曰：攻于後，以北血流漂杵。曰：建官惟賢，位事惟能。曰：列爵惟五分，土惟三。曰：所寶惟賢，曰：爲山九仞，曰：恭儉惟德，無載爾僞。曰：惟民生厚，因物有遷。曰：萬世同流。曰：忱

惕曰。格其非心。其所攘者。豈特放心而止哉。惟放心二字不顧。乖刺孟子之本旨。蒙蔽後儒之聰明。吾是以發其辯如此。若夫泮水。儻予之類。則蒐羅無遺。所以要信於後人。非蹈襲之比。但改竄易置。穿穴之變多。時與孟夫子所引者相背而馳。亦非復尙書之本經。其侮聖言而無忌憚者多矣。仁人君子。欲盡忠於聖人。而恢復乎本經者。其精擇之哉。

資富能訓。惟以永年。惟德惟義。時乃大訓。不由古訓。于其何訓。

庶士資富。乃世祿之家。而能訓之。可以終其性命矣。蜀先主戒子曰。惟德惟義。可以服人。周之訓丹書。敬義是也。故今亦以德義承上文。與蕩降德。修滅義。正相反也。不由古訓。將以何者爲訓乎。

王曰。嗚呼。父師。邦之安危。惟茲殷士。不剛不柔。厥德允修。

秦誓。邦之杌隳。邦之榮懷。今約以邦之安危一句。惟在茲殷多士。考多士篇。末言爾攸居。至康王十二年。命畢公保釐之時。將四紀矣。非止三紀而已。猶以爲安危係之者。僞辭也。非康王之命也。旣言世變風移矣。又言餘風未殄。自相矛盾者也。殷之多士。從武庚。鄙我周邦。曰予復之意。正孟子所謂故家遺俗者。故周公而命之辭。則曰。非我小國。敢弋殷命。又曰。非我有周秉德。不康寧。又言爾先祖成湯。革夏。俊民。甸四方。自成湯。至于帝乙。罔不配天。其澤在今。後嗣王誕罔顯于天。上帝不保。降若茲大喪。但言紂之無道。自絕于天耳。初未嘗言殷庶士之無禮蔑義。且驕淫矜侈。亂之本也。其亡也無日。周公何故與之言我小國敢弋殷命哉。以周公而命之辭。而較之東晉僞古之篇。何啻雪之見。不覺如消者哉。且周公當時以夏

之俊民比之。至康王時，已在四紀之後，猶以自不式時大訓而謂之頑民，何耶？

惟周公克慎厥始，惟君陳克和厥中，惟公克成厥終。三后協心，同底于道。道洽政治，澤潤生民。四夷左衽，罔不成賴。予小子永膺多福。

洛誥多士多方所作，皆周公爲遷洛之事也。故曰：克慎厥始，多方曰：時惟爾初，不克敬于和，則無我怨。故曰：君陳克和厥中，君陳想齒德俱尊於畢公者，故能亂周而先畢，然經傳別無明文，其故何哉？細考之，以既見聖弗克由聖，惟周公可當聖字，故以之繼周公歟。三后協心，先後不同，遠矣，亦擬不於其倫者。雖有呂刑之三后可據，然周公之勳莫之與京，同列於稱，可謂不辭，且畢公在焉，而曰：后曰：協心曰：道政曰：澤又賴及於四裔多福，膺於在己，似非所以命曾大翁之禮也。要之，有類於晉時作文之體。襄十四年，劉定公曰：王室不壞，繄伯舅是賴。

公其惟時成周，建無窮之基，亦有無窮之聞。子孫訓其成式，惟乂。

惟時成周，卽東郊之地也。漢書：建不拔之基。詩：令聞不已。子孫訓其成式，惟乂。卽是訓是行之謂。

嗚呼！罔曰弗克，惟既厥心。罔曰民寡，惟慎厥事。欽若先王成烈，以休于前政。

以世臣元老而戒之以罔弗克，當盡厥心。又戒之以罔曰民寡，當慎厥事。又戒之以欽若先王成烈，又戒之以休于前政，似非藐藐幼孫，所以對曾大翁者之言語氣象。疑後世之強作解事者爲之，不然，何周公謂之俊民，而此篇直謂之頑民哉？劉定公曰：纂乃祖考，無忝乃舊。

君牙。王若曰。嗚呼。君牙。惟乃祖乃父。世篤忠貞。服勞王家。厥有成績。紀于太常。

盤庚。乃祖乃父。又曰。世選爾勞。金縢。成王曰。昔公勤勞王家。文侯之命。有績予一人。洛誥。其自時中。又萬邦咸休。惟王有成績。周禮。司勳。凡有功者。銘書於王之太常。祭於大烝。司勳詔之。

惟予小子。嗣守文武成康遺緒。亦惟先王之臣。克左右亂四方。心之憂危。若蹈虎尾。涉于春冰。

詩。惟予小子。未堪家多難。中庸。纘太王。王季。文王之緒。惟予二字。見顧命。小子亦見顧命。嗣守文武四字。亦見顧命。文侯之命。亦惟先正。克左右昭事。厥辟。顧命曰。爾先公之臣。服于先王。又曰。其能而亂四方。詩曰。心之憂矣。易曰。履虎尾。詩曰。如履薄冰。又荀子。君臣篇。狎虎則危。災及其身。而引詩曰。不敢暴虎。一節。至如履薄冰。老子。若冬涉川。

今命爾予翼。作股肱心膂。纘乃舊服。無忝祖考。宏敷五典。式和民則。爾身克正。罔敢弗正。民心罔中。惟爾之中。

予翼。見臯陶謨。及周書。周語。太子晉曰。謂其能爲禹股肱心膂。以養物豐民人也。襄十四年。劉定公曰。纂乃祖考。無忝乃舊。今改作纘。乃舊服。無忝祖考。凡劉定公之言。用之不一而止。下文乃惟由先王舊典。卽變茲率臯氏之典。率乃祖考之攸行。又用率字。臯陶謨。勅我五典。五惇哉。堯典。敬敷五教。在寬。左傳。和民則詩。有物有則。論語。子帥以正。孰敢不正。書。又言率自中。商書。古文。又言建中于民。倪寬言。惟天子建中和之極。

夏暑雨。小民惟曰怨咨。冬祁寒。小民亦惟曰怨咨。厥惟艱哉。思其艱以圖其易。民乃寧。

緇衣。君雅曰。夏日暑雨。小民惟曰怨。資冬祈寒。小民亦惟曰怨。上句多曰字。下句無資字。鄭注。雅書序作牙。假借字者。君雅。周穆王司徒。作尙書篇名也。資當爲至。齊魯之語。聲之誤也。古文雅作牙。資作咨。連上文無曰字。下句亦有咨字。孔氏曰。鄭不見古文尙書。老子爲無爲章。圖難於其易。漢書。民以寧一。

嗚呼。不顯哉。文王謨。不承哉。武王烈。啓佑我後人。咸以正罔缺。爾惟敬。明乃訓。用奉若于先王。對揚文武之光命。追配于前人。

孟子作佑啓我後人。咸以正無缺。然非若緇衣明言君雅之篇。則亦未知其的在何篇。孟子上文極論周公相武王之事。而引此書曰者。竊疑其爲周公發。非爲君牙言耳。詩敬明其德。漢書奉若天道。詩對揚王休。說命又曰對揚天子之休命。

王若曰。君牙。乃惟由先正。舊典時式。民之治亂在茲。率乃祖考之攸行。昭乃辟之有乂。

詩昔吾有先正。又羣公先正。君陳亦曰。爾尙式時。周公之猷訓。孟子天下之生久矣。一治一亂。臯陶曰。念茲在茲。詩率由舊章。乃祖見盤庚。詩戎醜攸行。文侯之命。用會紹乃辟。康誥。用康乂民。

罔命

史記。穆王閔文武之道缺。乃命伯冏申誠太僕國之政。作蹇命。周公作立政。歎綴衣虎賁。知恤者鮮。故此篇特作命書。致隆於陪僕。執御之臣。故首以立政宅不后之文。

王若曰。伯冏。惟予弗克于德。嗣先人宅不后。怵惕惟厲。中夜以興。思免厥愆。

康誥曰。克明德。立政曰。宅乃事。宅乃牧。宅乃準。茲惟后矣。乾九三。夕惕若厲。孟子言。周公其有不合者。仰而思之。幸而得之。坐以待旦。詩。宣王欲早起。問夜如何。其夜未央。又夙興夜寐。秦誓。則罔所愆。易。無咎者。善補過也。

昔在文武。聰明齊聖。小大之臣。咸懷忠良。其侍御僕從。罔匪正人。以旦夕承弼厥辟。出入起居。罔有不欽。發號施令。罔有不臧。下民祇苦。萬邦咸休。

詩。昔在中葉。中庸。聰明睿知。小序。堯聞之聰明。左傳。史克稱八愷。齊聖廣淵。微子之命。乃祖成湯。克齊聖廣淵。既全以與成湯。今又分齊聖二字。以言文武。仲虺之誥。小大戰戰。咸懷忠良者。孟子。左右前後。皆薛居州也。旦夕承弼者。有違卽弼也。出則警。入則蹕。起居注。漢書。號令文章。煥然可述。洛誥。萬邦咸休。易。萬國咸寧。盤庚。罔有不欽。詩。何用不臧。

惟予一人無良。實賴左右前後有立之士。匡其不及。繩愆糾謬。格其非心。俾克紹先烈。今予命汝作大正。正于羣僕侍御之臣。懋乃后德。交修不逮。

禮記引秦誓曰。惟予小子無良。顧命。惟予一人釗報誥。孟子曰。左右前後。皆薛居州也。又惟大人爲能格君心之非。楚語引衛武公曰。朝夕以交戒我。史老引武丁曰。必交修予。無予棄也。賈子曰。選天下之端士。孝弟博聞有道術者。以衛翼之。左右前後皆正人也。後文又曰。太傅匡其不及。周官又言有官君子。史。左

準繩周禮。以糾萬民。詩。弗念厥紹。宰夫八職。一曰正。掌官灋以治要。春官宗伯。有車僕。夏官司馬。有大僕。祭僕。御僕。隸僕。戎僕。齊僕。道僕。田僕之類。而正爲之長。大御。中大夫。周禮。大御最長。穆王欲伯罔正于羣僕。侍御之臣。欲其率下也。懋乃后德也。詩。方懋爾惡。仲虺之誥。又言德懋懋官。王懋昭大德。伊訓。方懋厥德。

慎簡乃僚。無以巧言令色使辟側媚。其惟吉士。

詩。及爾同僚。春秋傳。同官爲僚。王制。簡不帥教者。多方。簡畀殷命。又迪簡在王庭。尙爾事。有服在大僚。臯陶謨。巧言令色。孔壬論語。巧言令色鮮矣。仁。又友便辟。洪範。人用側頗辟。論語。寧媚於竈。立政。庶常吉士。僕臣正。厥后克正。僕臣諛。厥后自聖。后德惟臣。不德惟臣。

帝歌曰。股肱喜哉。元首起哉。詩。具曰予聖。所聞皆正言。所見皆正事。王誰與爲不善。不然。反是。爾無昵于儉人。充耳目之官。迪上以非先王之典。

立政。國則罔有立政。用儉人。又繼自今立政。其勿以儉人。秦誓。昵比罪人。充耳目之官。不慎簡乃僚也。啓迪在上。以非先王之典。以異端進者也。

非人其吉。惟貨其吉。若時瘼厥官。惟爾大弗克祇厥辟。惟予汝辜。

庶常吉士。見立政。又吉人之辭寡。見易繫辭。呂刑曰。惟貨。此言不求吉人而惟求吉貨。誠如是。則曠官之刺興矣。大弗克祇者。則漢法大不敬也。酒誥。越尹人祇辟。又曰。惟民自速辜。故曰。惟予汝辜。

王曰嗚呼。欽哉。永弼。乃后于彝憲。

欽哉。正經屢見之。皐陶謨。予違汝弼。洛誥。汝受命篤弼。大誥。弼我不丕基。酒誥。聰聽祖考之彝訓。

尙善考異卷第六

伏生所傳聖人之經。爲晉人假壁藏古文之名。擅改者多矣。爲聖經之一厄也。不可得而知矣。猶幸徐廣司馬貞等諸賢人君子及唐人之正義。略存一二。尙可考者。謹列於左。

堯典

辯章百姓。

司馬貞曰。辯字。古文尙書作平。史遷作便。此文蓋讀平爲浦耕反。平旣訓便。因作便章。其今文作辯章。古平字亦作便。音婢緣反。便則訓辯。遂爲辯章。鄒誕生本亦同也。

辯秩東作。

司馬貞曰。古文作平秩。史作便程。

申命義叔宅南交。

南交下。舊有曰明都三字。鄭注云。南交下三字磨滅。故以意補之也。僞古文直無此三字。僞孔安國傳曰。南交者。夏與春交也。司馬貞曰。孔注未是。然則冬與秋交。何故下無其文。且東嶠夷。西昧谷。北幽都。三方皆言地。而夏獨不言地。乃云與春交。斯不例之甚也。然南方之地有名交趾者。或古文略舉一字名地。南交則是交趾無疑也。今按小司馬之辨。極有功於聖經。可見僞書僞傳私見妄削。非

出藏壁之實。蔡沈不述鄭注南交下三字有磨滅之故。及晉人任意削去之罪。其頓忘伏生書之爲聖經甚矣。罪豈眚災也邪。失其本經。口以傳授者。猶有磨滅之形跡。僭號古文。目爲藏壁者。顧無三字之影響。而乃挾以自是。箝結後人之頰舌。晉人何其僭而狠也哉。蔡沈攘奪小司馬之注。以作傳。而不著其辯。以康成注爲陳氏而不考其所由來。又不知古文之非出於藏壁者。不公不明。真小黠而大癡者歟。

辯在伏物。

大傳當如此。司馬貞以爲太史公據之而作。便在伏物。晉古文作平在朔易。今以上文例之。知其如此。

舜讓於德不怡。

史遷怡作憚。古文改不怡作弗嗣。徐廣曰。今文作怡。怡卽憚也。司馬貞曰。謂辭讓於德不堪。所以心意不說。憚也。又前納于大麓。司馬貞亦譏孔注之非。其尊信聖經。真賢人君子之用心也。何者。作怡則下文受終。文脉方可貫。蓋心雖不安而不得已也。若旣曰弗嗣。而下文卽曰受終。乖刺甚矣。何先儒之不察邪。又顧命。王不釋。古文乃改作不憚。

眚災過赦。

史遷亦同。古文作眚災肆赦。鄭元注。眚災爲人作患者也。過失雖有害。則赦之。則今文肆作過無。

疑矣。元注下句又云。怙其姦邪。終身以爲殘賊。則用刑之。又襄九年。晉居疾于虎牢。肆眚圍鄭。古文用此肆字。

惟刑之謚哉。

徐廣曰。今文如此。爾雅云。謚。靜也。故史記作靜。司馬貞曰。古文作恤哉。且今文是伏生口誦。卹謚聲近。遂作謚也。今按謚字。誠聖人之言。恤字。不過常人之見耳。小司馬此言。猶徇常情者也。或問何以言之。曰。言謚。則恤意在其中。言恤。則啓後世故縱之失。

黎民祖飢。

徐廣曰。今文作祖。祖。始也。史遷作始。司馬貞曰。古文作阻饑。孔氏以爲阻。難也。祖。阻聲相近。未知誰得。今按晉人。因孟子險阻旣遠之阻。而改祖字。後儒以爲出於壁藏而信之。獨小司馬兩存置疑。不逞臆決。不苟附和。真篤信聖學之用心也。然則後儒者。又小司馬之罪人乎。

典樂教禘子。

鄭元曰。國子也。司馬貞曰。尙書作胄子。孔安國曰。禘。胄聲相近。馬亦曰。胄。長也。則前漢僞古文已改此字矣。不待晉人僞古文而後改也。

車陶謨

采政忽。以出內五言。

史記作來始滑。尙書滑字作奮。音忽。鄭元曰。奮者。臣見君所秉書。思對命者也。君亦有焉。以出內政。教於五官。司馬貞曰。古文尙書作在治忽。今文作采政忽。先儒各隨字解之。今史記云。來始滑。於義無所通。蓋來采字相近。滑忽聲相亂。始又與治相似。因誤爲來始滑。今依今文音采政忽三字。劉伯莊云。聽諸侯能爲政及忽怠者。是也。五言謂仁義禮智信五德之言。鄭元以爲出納政教五官。非也。今按采者。如古之諸侯采。詩以貢於天子之采。天子受之而列於樂官。於以考俗尙之美惡。與夫政治之得失。則其政其忽。皆可以採取而分擇矣。故曰采政忽。晉人但見舜典有在璿璣玉衡之在字。卽以易伏生之采。淺近平易而不艱澀矣。殊不知惟其艱澀而難明也。吾固以爲真。惟其淺近而平易也。吾固以爲僞。而先儒不明真僞之過小。屏棄聖經之罪大矣。

作繪。

今文作繪。馬鄭本皆如此。古文作會。蓋亦以其古字通用而改之也。

自我五禮五庸哉。

馬本傳。伏生書如此。古文作有庸。

天明威。自我民明威。

馬本傳。伏生如此。古文上句威字作畏。蔡沈依古文而注云。古文威作畏。何其舛哉。

奏庶稂食鮮食。

馬本如此。注云：根生之食謂百穀。古文作艱食。鄭元云：稷教人種菜蔬艱阨之食。則考之古文宜用鄭本。

鬲貢

鳥夷皮服。

鄭元曰：東北之民賦食鳥獸者。古文作鳥夷。馬融、王肅亦同作鳥。則漢時僞者已改此字矣。史記作鳥。

濟河惟沈州。

鄭元曰：言沈州之界在此兩水之間。史遷同。古文作沓。作十有三年乃同。

馬鄭本皆作年。古文作載。

厥土亦識墳。

埴。鄭作識。徐鄭王皆讀曰熾。古文作熾。與馬本同。

彭蠡既都。

鄭元云：南方謂都爲瀦。則是水聚會之義。史遷作都。司馬貞曰：古文尙書作瀦。則亦因鄭注而改是字也。

瑤瓊篠簜。

馬本如此。韋昭瓊音貫。古文作琨。

均于江海。

鄭本作松。曰松當爲訟。馬融作均。史記同。古文尙書作訟。亦因鄭元讀而卽改之也。雖似吾甚以爲不可也。

椀榦栝柏。

椀古文作種。榦本又作幹。

導開及岐。

馬本如此。古文作蚡。

至于陪尾。

漢書作橫尾。

榮播旣都。

司馬貞曰。古文尙書作榮波。此及今文並云。榮播。播是水播溢之義。榮是澤名。故左傳云。狄人及衛戰於榮澤。鄭元云。今塞爲平地。榮陽人猶謂其處爲榮播。今按小司馬之說。援引精當。信而有徵。可見古文之擅改今文。與土風自來相傳之稱謂。悉不合矣。先儒素以經學自負者。其能免於不克傳

疑之失乎。馬鄭王本皆作榮播。

和夷底績。

和又作穌。鄭云讀曰洹。

三百里納秸服。

秸本或作稽。工八反。馬云去其穎。音穌。

甘誓

天用巢絕其命。

馬本如此。玉篇子小反。古文作勦。

盤庚

左傳引此篇云。盤庚之誥。馬云不云盤庚誥。何。非但錄其誥也。取其徙而立功。故以盤庚名篇。則馬氏猶未嘗分爲三篇。從伏生舊也。鄭元云。盤庚上篇。是盤庚爲臣時事。史記云。盤庚崩。弟小辛立。殷復衰。百姓思盤庚。乃作盤庚三篇。則史遷鄭元皆已依先漢古文也。

小序將始宅殷。

汲冢古文云。盤庚自奄遷于殷。束皙云。尙書序。盤庚五遷。將治亳殷。孔子壁中尙書云。將始宅殷。實與古文不同也。孔穎達云。孔子壁內之書。安國先得其本。此將治亳。殷不可作將始宅殷。亳字磨滅。

容或爲宅。壁內之書。安國先得。治皆作亂。其字與始不類。無緣誤作始字。知束皙不見壁中之書。妄爲說耳。今按晉人以毫殷爲一。在河南。束皙以殷在河北。與毫異。穎達篤信晉書。譏彈束皙。然束皙之言得之。而穎達非也。

若顛木之有由枿。

馬云。顛木而肄生曰枿。晉古文作𣎵。說文作𣎵。由。說文作𣎵。

不昏作勞。

馬本。晉古文同。鄭本作𣎵。勉也。

予不掩爾善。

掩。本又作𣎵。

誕告用單。

馬云。單。丁。但反。誠也。晉人作𣎵。

高宗彫日。

爾雅云。又祭也。周曰繹。商曰彤。夏曰復。胙。

西伯戲著。

晉古文作黎。伏生尙書大傳作者。戲。說文作𣎵。

微子小序

殷既錯天命。

馬云錯廢也。

用又稠斂。

馬云稠數也。鄭本晉古文作讐。

自清。

馬云潔也。晉古文作靖。

牧誓

說文。牧作姆。音母。

千夫長。百夫長。

鄭元注師帥旅帥。元意以周禮二千五百人爲師。師帥皆中大夫。五百人爲旅。旅帥皆下大夫。百人爲卒。卒長皆中士。晉人修之曰師帥卒帥。可見非先漢孔安國矣。

弗禦克奔。以役西土。

馬氏曰禦禁也。役爲也。晉人作逐。

洪範

明作哲。

孔穎達曰。哲字。王肅及漢書五行志皆云。哲。智也。定本作哲。則讀爲哲。晉人僞傳云。照。了也。亡悔。榮獨而畏高明。

馬本如此。晉人作無虐。畏。鄭音威。

時人斯其惟皇之極。

穎達曰。此經或言時人德。鄭王諸本皆無德字。孔傳亦不以德爲義。定本其德。疑衍字也。

曰哲。時燠若。

也。今按詩小雅。或哲或謀。作哲爲是。但伏生晉人本。皆作哲。音制。以照哲釋之。惜乎蔡沈之不能存疑也。

曰舒。恆燠若。

晉人作豫。鄭王本皆作舒。鄭注。舉。遲也。王肅云。舒。惰也。以對照哲。故爲遲惰也。下文急。鄭云。急促自用也。

旅葵小序

西旅獻葵。

馬云。作豪。酋豪也。鄭云。葵。讀曰豪。西戎無專屬。強大有政者爲酋豪。國人遣其酋豪來獻。見於周也。

孔達穎譏之曰。良由不見古文。妄爲此說。

金滕小序

王鄭皆曰。滕束也。鄭又云。凡藏祕書。藏之於匱。必以金緘其表。是祕密之書。皆藏於匱。非周公始造此匱。獨藏此書也。

武王有疾不豫。

馬本如此。僞古文無不豫二字。

王有疾弗豫。

豫本又作杼。

植璧秉珪。

晉人傳云。植置也。孔穎達曰。鄭云。植古置字。故云置也。

惟爾元孫某。

晉人傳云。元孫。武王也。某。名。臣諱君。故曰某。孔穎達曰。秦誓。牧誓。皆不諱發。而此獨諱之。孔惟言臣諱。不解諱之意。鄭元云。諱之者。由成王讀之也。意雖不明。當謂成王開匱得書。王自讀之。至此字。口改爲某。史官錄爲此篇。因遂成王所讀。故諱之。牧誓。王自稱者。令人史制爲此典。故不須諱之。我之弗辟。

馬鄭音避。謂避居東都。晉人傳云。辟法也。以法治三叔也。

對曰。信噫。

噫。馬本作懿。猶億也。

惟朕小子其親迎。

馬本如此。晉人作新逆。

盡起而築之。

本亦作筑。謂築其根。馬云。築。拾也。鄭王皆云。拾也。孔穎達曰。木爲大木所偃者。起其本。拾下禾。無所亡失。

大誥小序

陳壽云。臯陶之謨略而雅。周公之誥煩而悉。何則。臯陶與舜禹共談。周公與羣臣矢誓也。其意或然。但君奭康誥與召公康叔語。其辭亦甚委悉。抑亦當時設言。自好煩複也。管蔡導武庚爲亂。此篇略於管蔡者。蓋難以伐弟爲言。故專說武庚罪耳。誥本亦作笄。

三監及淮夷叛

鄭云。三監。管、蔡、霍也。晉人傳云。管、蔡、商。蓋見大誥一篇。專爲殷小腆而誥。故改之如此。非晉人之僞傳。而何。然鄭之說。自有孟子監殷可證。僞傳非是。

大誥。繇爾多邦。

馬本如此。晉人作猷。大誥爾多邦。鄭王本猷皆在誥下。漢書王莽攝位。東郡太守翟義叛莽。莽依此作大誥。其書亦猷在誥下。

天降害于我家。弗少延。

馬本如此。晉人害作割。弗作不。延字讀屬下句。馬鄭皆以延上屬爲句。

若考作室。旣底法。厥子乃弗肯堂。矧弗肯構。厥考翼其肯曰。予有後。弗棄基。厥父菑。厥子乃弗肯播。矧弗肯穫。厥考翼其肯曰。予有後。弗棄基。

定本肯構肯穫之上。皆有弗字。晉人刪去。鄭王本於肯構之下。亦有厥考翼一經。晉人刪去。孔穎達曰。治田作室。爲喻旣同。故以此經結上二事。取喻旣同。不應重出。蓋先儒見下有而上。無謂其有脫而妄增之。孔穎達旣逞其臆見如此。蔡沈略不置思。而卽從之。遂使聖人之經爲晉人所塗抹也。凡一十有四字。嗚呼惜哉。吾嘗反覆讀之。反覆思之。伏生之書。誠出於壁藏。而晉書之僞。自不可蓋也。夫作室必由堂而後構。治田必由播而後穫。旣不肯堂。構於何所。旣不肯播。穫於何物。未有不克堂而猶可望之以肯構。不肯播而猶可望之以肯穫也。故當依定本。肯構肯穫之上。皆有弗字。然後爲是其辭氣不可斷絕。與厥考翼一經相爲唱和。故此一經決不可少。乃聖人之本經。穎達以爲先儒之妄增。則非矣。晉人不知全章之大勢。錯認乃字與矧字若相唱和。其意以爲堂播之始者輕者。尙

不肯爲。況構穫之終者重者其肯爲之乎。如此則二句辭氣雍容。可以暫歇。故直削去厥考翼一經而不顧也。殊不知聖人之本經。若曰。乃既不肯堂。矧又不肯構。則厥考翼其肯曰。我有後弗棄基者乎。言必不以不肯堂不肯構者之子爲有後不棄基者也。下條亦然。此其辭氣安可妄削哉。疏家專門黨同伐異。不足責也。蔡沈游於文公之門。所當虛心平氣發潛經之幽光。然後爲有功於文公。今晉人曰。伏生失其本經。口以傳授。則諾。古文出之壁藏。定爲五十九篇。則諾。如此等處直削經文。蒙蔽後學。皆其大也。茫不知覺。是其胸中憤憤亦已久矣。吾請有以曉之。甘誓曰。左不攻于左。汝不共命。右不攻于右。汝不共命。御非其馬之正。汝不共命。凡三用汝不共命。以上二汝不共命爲後儒妄增可乎。此猶其在夏書者。牧誓曰。不愆于六步七步。乃止齊焉。夫子勗哉。不愆于四伐五伐六伐七伐。乃止齊焉。勗哉夫子。尙桓桓如虎如貔如熊如羆于商郊。弗迓克奔。以役西土。勗哉夫子。凡一用夫子勗哉。二用勗哉夫子。以上二句爲後儒妄增。又可乎。此猶其在誓言者。召誥曰。相古先民有夏。天迪從子保。面稽天若。今時既墜厥命。今相有殷。天迪格保。面稽天若。今時既墜厥命。凡兩用今時既墜厥命。不可以爲重複而當削一句也。又其下文曰。我不敢知曰。有夏服天命。惟有歷年。我不敢知曰。不其延。惟不敬厥德。乃早墜厥命。我不敢知曰。有殷受天命。惟有歷年。我不敢知曰。不其延。惟不敬厥德。乃早墜厥命。則其言之重複。殆有甚焉。若曰。夏殷二事。立言也同。但以後章惟不敬厥德。乃早墜厥命。結上二事可矣。則其侮聖言也。豈不甚哉。何以異於是。

洛誥

乃洪大誥治。

一本作周公迺洪大誥治。

酒誥

成王若曰。明大命于妹邦。

馬本如此。注云。言成王者未聞也。俗儒以爲成王骨節始成。故曰成王。或曰。以成王爲少成。二聖之
功生。號曰成王。沒因爲謚。衛賈以爲戒成康叔以慎酒。成就人之道也。故曰成。此三者吾無取焉。吾
以爲後錄書者加之。未敢專從。故曰未聞也。妹邦。馬云。卽牧養之地。朱子嘗曰。漢儒釋經之例。多曰
未詳。有曰未聞。孔安國句句要解過。獨與漢儒異。殆謂此等處也。成王二字。馬氏特曰。未聞。疑之而
不敢刪。晉人直刪二字。正猶論語之雖少必作。直改之爲坐。子樂直改之爲曰。非不可者。但以爲尊
信論語。則亦妄人而已矣。蔡沈親炙朱子。言諄諄而聽藐藐。亦爲不善變矣。孔穎達曰。馬鄭王本以
文涉三家而有成字。鄭元云。成王所言。成道之王。三家云。王年長骨節成。皆爲妄也。穎達言三家。謂
習歐陽大小夏侯三家者也。穎達專門。凡與孔安國異者。皆譏爲妄言耳。今按成王二字見篇中。自
成湯成至于帝乙。成王畏相。又云。助成王德顯。故於篇首。卽言以古先成王之道戒之云耳。晉人不
知此義而刪去者。非也。

杼材

馬氏曰古作梓字。治木器曰梓。治土器曰陶。治金器曰冶。晉人於上篇成王字。因馬氏以爲後加直。刪去。況今馬氏有古作梓之言乎。

皇天既附中國民。

馬本如此。晉人作付。

召誥

敢以王之讐民百君子。

讐或作酬。

洛誥

戊申王在新邑。

馬本與晉人如此。點句。鄭云。王在新邑烝祭句。

多士

非我小國敢翼殷命。

馬本如此。晉人作弋。義同。鄭元王肅本皆作翼。注亦云。取也。鄭云。猶驅也。非我周敢驅取爾殷之王。命。雖訓爲驅。亦爲取義。

嚮于時。夏弗克庸帝。大淫。屑有辭。

馬本如此。時字絕句。屑過也。晉人作洗。又作僧。

無逸

儼恭寅畏。

馬本如此。晉人作嚴。

文王俾服。卽康功田功。

馬本如此。俾使也。晉人俾作卑。

自朝至于日中。昃。

本亦作仄。

君奭小序

召公爲保。周公爲師。

馬鄭云。保氏師氏。皆大夫官名。晉人云。保。太保。師。太師也。

迪見勗聞于上帝。

馬本如此。勗勉也。晉人作冒。

多方

不克終日勸于帝之攸。

馬本如此攸所也。晉人作迪。

因甲于內亂。

鄭王皆以甲爲狎。王云狎習災異於內外爲禍亂。鄭云習爲鳥獸之行。於內爲淫亂。晉人僞傳曰外不憂民。內不勤德。因甲於二亂之內。正義曰夾聲近甲。古人甲與夾通用。夾於二事之內。而爲亂行。爾罔不克剝。

馬本如此。晉人作臬。

賄息慎之命小序

息慎來賀。

馬本如此。晉人作肅慎。

王俾榮伯。

俾必爾反。馬本作辨。

顧命

王不釋。

馬本如此。注云疾不解也。晉人作懌。蓋用史記舜讓於德不懌之文。其意以爲彼作弗嗣。而此用不

懌。則於文意兩得其當。可以易伏生本經而無疑也。然而愚則以爲於彼此文意。兩失其當。顧乃以之易伏生本經。斯其所以爲無忌憚之尤者也。

洸類水。

類。說文作沫。云古文作類。說文之所稱古文者。謂馬鄭等所傳者。

憑玉几。

說文。憑。作凭。云依倚也。字林同。父冰反。

在後之詞。

馬本如此。云共也。晉人作侗。

成王崩。

馬本如此。注。安民立政曰成。晉人無成字。

四人騏弁。

馬本騏。青黑色也。晉人作綦。從鄭王本也。鄭元云。青黑曰綦。王肅云。綦。赤黑色。

王三宿三祭三詔。

馬本詔。丁故反。奠爵。說文同字。亦作宅。晉人作咤。王肅亦以咤爲三奠爵。鄭云。徐行前曰肅。却行曰咤。王徐行前三祭。又三却復本位。

康王之誥小序

正義伏生以此篇合於顧命共爲一篇。後人知其不可分而爲二。馬鄭王本此篇自高祖寡命以上內於顧命之篇。王若曰以下始爲康王之誥。諸侯告王。王報誥諸侯而使告報。異篇失其義也。

成王崩。康王既尸天子。

馬本如此。晉人無成王崩三字。

王若曰。

馬鄭王本從此以下爲康王之誥。又云與顧命差異。敍歐陽大小夏侯同爲顧命。

呂刑

鴟義姦宄。

馬云鴟輕也。義本亦作誼。

皇帝。

古文作君帝。孔穎達曰君宜作皇。後又曰君帝。帝堯。

折民惟刑。

馬鄭王皆音哲。馬云智也。

于有邦有土。

馬本如此。于於也。晉人作吁。

惟貨惟求。

馬云。有求請賂也。晉人作來。

文侯之命小序

王賜晉文侯。

馬本如此。晉人王上有平字。賜作錫。

父義和。

馬云。能以義和諸侯。本作誼。鄭元讀義爲儀。儀仇。皆匹也。故名仇。字儀。

費誓


東郊不開。

舊讀皆作開。馬本作關。

秦誓

惟截截善偏言。

馬本如此。云截截辭語。截。削省要也。偏。少也。辭約指明。大辨佞之人。晉人作諠。音辨。



尚書注考

陳泰交撰

本館據海山仙館
叢書本排印初編
各叢書僅有此本

四庫全書提要

案尙書註考一卷。明陳泰交撰。朱彝尊經義考載陳氏泰來尙書註考一卷。註曰未見。又註泰來字長水。平湖人。萬歷丁丑進士。官至禮部精膳司員外郎。案明吳永芳嘉興府志載陳泰交字同倩。萬歷中國子監生。所著尙書註考與經義考迥異。然經義考引項臯謨之說稱同倩治尙書作注考云云。明出泰交之字。則彝尊未見其書。誤以泰交爲泰來審矣。其書皆考訂蔡沈書傳之訛。謂有引經註經不照應者三條。又有同字異解者三百二十三條。皆直錄註語。不加論斷。其同字異解者一字或有數義。抉摘未免過嚴。其不照應三條。如凡厥正人。引惟厥正人爲證。曰若稽古帝堯。引越若來爲證。德懋懋官。引時乃功懋。哉爲證。則前後顯相矛盾。誠爲蔡氏之疏略矣。馬明衡尙書疑義。袁仁砮蔡編。頗以典制名物補正蔡傳之闕誤。泰交此書。則惟較量于訓詁之間。而所謂訓詁異詞者。又皆以矛攻盾。未及博援古義。證以舊文。故爲少遜于二家。然釋字釋義二者相資。均謂之有功。蔡傳可也。乾隆五十年十月校。

尙書註考序

我高皇帝明經比士。詔用古註疏。不知罷于何年。豈自文皇帝纂修大全後乎。大全首經文。次傳註。後附諸說。意深遠矣。累朝申飭中外。若曰宗是者。始得錄第。棘闈告竣。宗者售。變通其說者亦售。太抵宗註之文善守。離註之文善攻。守多發明。然沿迹而謹嚴。攻多辨駁。每師心而閑肆。柄文者听夕繙校。或方厭倦。偶得才氣稜稜。超軼尋常。雖出入于傳註。意其人必忼慷任事者。乍而喜。倏而疑。既而憐拔之。具一種人物。供王國用。是將羶激其未試。而非作楛其見在也。學者遂慕爲神奇。爲捷徑。爲宗匠。誤矣。師友以是劑之。父兄以是督之。不益誤哉。余並陳同倩治尙書。促膝問難。希挾蔡先生仲默之精。不負古壁之發。而同倩復編註考一帙。與同志宗守敬應明詔。其嘉惠豈小補耶。信如考之。同字異解也。引經注經而不照應也。其真鐵板與。其似一定不變者。與家嚴貞元君嘗謂余曰。汝知鐵板書經乎。曩在都下。遇一建陽友人。言敝境之山有鐵板洞。仲默先生隱居洞中。註書畢日始出。故云然。他年按蹟問奇。博一勝遊。徐徐表識。蔡先生讀書處。其樂何如。茲願高明永宗如鐵板。則余僭引之意明。萬歷己亥長至日。項臯謨識。

尙書註考

明 陳泰交撰

引經註經。不照應者三條。

曰若稽古帝堯。訓曰粵越通。古文作粵。曰若者發語辭。周書越若來。亦此例也。越若來。訓古語辭。言召公于豐迤邐而來也。

時乃功懋哉。訓懋勉也。德懋懋官。訓懋茂也。繁多之意。與時乃功懋哉之懋同。凡厥正人。訓正人者在官之人。如康誥所謂惟厥正人者。惟厥正人。訓庶官之長。

同字異解者三百二十二條。

虞書曰虞舜。訓虞舜氏。汝作朕虞。訓虞。掌山澤之官。若虞機張。訓虞人也。儆戒無虞。不虞。率典出入。自爾師虞。訓虞度也。

堯典。訓說文曰。典從册在丌上。尊閣之也。象以典刑。谷守爾典。其爾典聽朕教。訓典。常典。朕三禮典。厥義。惟典神天。訓典。主也。有典有則。訓典。猶周之六典。所以治天下之典。幸不迪率典。訓典。常法也。其大惇典。訓典。典章也。后式典集。訓典。舊典也。伯夷降典。訓典。禮也。

曰放勳。訓曰者。猶言其說如此也。思曰贊贊。訓思曰之。曰當作日。曰我王來。曰無戲意。訓曰者。盤庚之辭也。曰父師。訓曰者。微子更端之辭也。曰述矣。訓曰者。武王之言也。曰有道。訓曰者。舉武王告神之語。曰

皇極之敷言訓曰起語辭曰乃其速由訓曰者言如此曰天子作民訓曰者民之辭也
稽古帝堯七稽疑其稽我古人之德訓稽考也若稽田訓稽治也

欽明文思訓欽恭敬也欽厥正訓欽者肅恭收斂

欽明文思訓明通明也克明俊德訓明明之也天明畏訓明者顯其善侯以明之訓明者欲明其果頑愚
讒說與否也方施象刑惟明訓明者言其刑罰當罪可以畏服乎人也視曰明訓明者無不見也時乃
大明服訓明者明其罰公明保予冲子訓明者顯明之也明禋訓明潔明清于單辭訓明者無一毫之
蔽

欽明文思訓文文章也乃武乃文訓自其英華發外而言則謂之文文子文孫訓成王之時法度彰禮樂
著守成尙文故曰文

允恭克讓訓克能也克紹乃辟于先王訓克者責望必能之辭二曰剛克訓克治也曰克訓克者交錯有
相勝之意

光被四表被孟豬訓被及西被于流沙訓被覆也

光被四表訓光顯以近天子之光訓光者道德光華也

格于上下歸格于藝祖七句有苗格格爾衆庶格人庶有格命訓格至也格汝舜訓格來格則承之訓格
有恥且格之格謂改過也祖考來格訓格神之格思之格惟先格王訓格正也猶格其非心之格其有

能格知天命。訓格。格物之格。天壽平格。訓格者。通徹三極而無閒者也。

格于上下。訓上天下地也。上下。草木鳥獸。訓上下。山林澤藪也。達于上下。訓上天下民也。下管鼗鼓。訓下

堂下之樂也。汝何生在上。訓上天也。

平章百姓。平秩東作。訓平均地。平天成。訓水土治。曰平。天壽平格。訓坦然無私之謂平。平邦國。訓平謂強不得凌弱。眾不得暴寡。而人皆得其平也。

平章百姓。訓章明五服五章哉。訓章顯也。

黎民。訓黎黑也。民首皆黑。故曰黎民。乃命重黎。訓黎高陽之後。

於變時雍。女子時。惟時懋哉。咸若時。若不在時。惟帝時舉。時日曷喪。予惟時其遷居。仰惟前代時若。訓時是也。勳惟厥時。訓時措之宜也。協時月正日。訓時謂四時。曰時。訓雨暘燠寒風各以時至。故曰時也。

至于旬時。訓時三月。

乃命羲和。乃反商政。訓乃者。繼事之辭。乃言底可績。訓乃汝政。乃又訓乃者。難辭也。

欽若昊天。疇咨若時登庸。誓亦允若。若有恆性。非天攸若。灼知厥若。前代時若。訓若順也。疇若予工。訓若順其理而治之也。若否。訓若者。如我之意。

歷象日月星辰。訓象所以觀天之器。象傲。訓象。舜異母弟名。象以典刑。訓象。如天之垂象以示人。子欲觀古人之象。訓象像也。

歷象日月訓日陽精月陰精協時月正日訓月謂月之大小日謂日之甲乙日號泣于旻天訓日非一日也二日月三日訓月者定晦朔也日者正躔度也

宅嵎夷祭濟宅訓宅居也三有宅訓宅以位言

寅寅出日訓寅敬也夙夜惟寅訓寅敬畏也嚴恭寅畏訓寅則欽肅

寅寅訓寅禮接之如賓客也賓于四門訓古者以賓禮親邦國諸侯各以方至而使主焉故曰賓七月寅

訓賓者禮諸侯遠人所以往來交際也作賓于王家訓賓以客禮遇之也賓稱奉主訓賓諸侯也

平秩東作咸秩無文訓秩序柴望秩于山川訓秩者牲帛祝號之次第汝作秩宗訓秩敍也天秩有禮訓

秩者尊卑貴賤等級之品秩也

平秩東作訓作起也大陸既作訓作者言可耕治盤庚作訓作起而將遷之辭作我見王訓作興起也潤

下作鹹訓作為也用作凶訓作動作也

以殷仲春訓殷中也九江孔殷訓殷正也王肇稱殷禮訓殷盛也

申命羲叔訓申重也申畫郊圻訓申云者申明之也

以正仲夏訓正者夏至陽之極午為正陽位也以正仲冬訓亦曰正者冬至陰之極子為正陰位也罔或

于予正訓正政將有大正于商訓正即湯誓不敢不正之正一曰正直訓正者無邪惟正是人之訓正

猶康誥所謂正人與官正酒正之正指當職者為言正于五刑訓正質也

星火訓火謂大火藻火訓火取其明也。

厥民夷受有億兆夷人訓夷平也。乃夷居弗事上帝訓夷躑踞也。夷王訓夷常也。

厥民隩訓隩室之內也。四隩既宅訓隩隈也。

咨汝義訓咨嗟也。疇咨若時登庸訓咨訪問也。

允釐百工訓釐治釐降二女保釐東郊訓釐理也。

允釐百工訓工官也。工以納言訓工掌樂之官也。工執藝事訓百工也。

庶績咸熙訓咸皆巫咸訓咸名。

疇咨若時訓疇誰亮采惠疇九疇訓疇類。

若是登庸帝庸作歌王庸作書庸庸非天庸釋有夏訓庸用車服以庸生生自庸訓庸民功自我五禮有

庸哉王惟庸罔念聞訓庸常也。

膺子朱罔非天膺訓膺嗣也。膺征膺之舞衣訓膺國名。

啓明啓乃心訓啓開也。啓呱呱訓啓禹之子。

疇咨若予采載采采訓采事以五采訓采者青黃赤白黑也。百里采訓采者鄉大夫邑地。

吁嚚訟可乎訓吁者歎其不然之辭。吁咸若時訓吁者歎而未深然之辭。

驩兜曰都訓都者歎美之辭。臯陶曰都訓都者臯陶美其問也。簡恤爾都訓都者國之都鄙也。

方鳩僇功訓方且方行天下訓方四方也。

咨四岳訓四岳官名一人而總四方諸侯之事者也。乃日觀四岳訓四岳四方之諸侯。內有百揆四岳訓曰岳總其方岳者。

洪水方割訓割害也。割正夏訓割斷也。率割夏邑訓割剗割夏邑之割。

蕩蕩懷山訓蕩蕩廣貌。王道蕩蕩訓蕩蕩廣遠也。

懷山訓懷包其山而也。邦之榮懷訓懷安也。

襄陵訓襄駕出其上也。贊贊襄哉訓襄成也。

有能俾乂訓俾使罔不率俾訓俾廣韻曰從也。

有能俾乂訓乂治也。從作乂訓乂條理也。

僉曰於緜哉訓僉衆共之辭。四岳與其所領諸侯之在朝者同辭而對也。僉曰伯禹訓僉衆也。四岳所領四方諸侯有在朝者也。

咈哉訓咈者甚不然之辭。罔咈百姓從諫弗咈咈其考長訓弗逆也。

方命圯族訓族類也。罪人以族訓族親族也。官伯族姓訓族同族也。

九載績用勿成訓載年也。熙帝之載祇載見瞽瞍訓載事也。載采采訓載行也。乃賡載歌訓載成也。既載

壺口訓經始治之謂之載。

否德訓否不通。朕志若否。訓否者非我之意。

明明揚側陋。訓上明謂明顯之下明。謂已在顯位者。明明我祖。訓明明。明而又明也。明明在下。訓明明者。精白之容也。

明明揚側陋。我武惟揚。訓揚舉也。敢對揚天子。訓揚者揚于衆。

師錫帝震驚朕師。班師振旅。用爽厥師。答其師。出自爾師。虞師聽五辭。受王嘉師。其歸視爾師。訓師衆。德無常師。師汝昌言。訓師法也。官師相規。訓師以道言。八曰師。訓師者除殘禁暴也。太師訓師。道之教訓。

師錫帝。訓錫與禹錫元圭。訓錫與師錫之錫同。天乃錫禹。訓錫賜也。橘柚錫貢。訓錫者必待錫命而後貢。

非歲貢之常也。九江納錫。訓錫者下與上之辭。重其事也。

帝曰。俞。予聞訓。俞。應許之詞。俞。汝往哉。訓。俞者。然其舉也。

子聞如何。訓如何者。復問其德之詳也。吁。如何。訓如何者。臯陶問其孜孜者何如也。

警子。訓警。無目之名。警。奏鼓。訓警樂官。

烝烝乂不蠲烝。訓烝。進也。永底烝民之生。烝民乃粒。訓烝。衆也。

觀厥刑于二女。訓刑法也。考朕昭子刑。訓刑儀刑也。

釐降二女。德乃降。用降我凶德。訓降。猶今法降等云者。

媯汭訓水北曰汭。涇屬渭汭。訓汭水名。

欽哉訓堯戒二女之辭。欽哉慎乃有位。訓欽哉言不可不謹也。

重華訓華光華也。華玉仍几訓華彩色也。

重華協于帝。協于克一相協厥居。訓協合也。畢協賞罰。訓協和也。

重華協于帝。惟帝其難之。訓帝謂堯也。祇承于帝。帝初于歷山。訓帝謂舜。

濬哲文明。明作哲。茲四人迪哲。訓哲智。知人則哲。訓哲智之明也。弗造哲。訓哲者明哲也。

玄德升聞。訓玄幽潛也。厥篚玄纁。訓玄赤黑色幣也。

五典克從。言曰從。訓從順也。恆衛既從。訓從者從其道也。漆沮既從。訓從者從于渭也。

納于百揆。訓百揆者揆度庶政之官。內有百揆四岳。訓百揆無所不總者。

四門穆穆。訓穆穆和之至也。旁作穆穆。訓穆穆和敬也。亦則以穆穆。訓穆穆和敬貌。穆穆在上。訓穆穆者

和敬之容也。

雷雨弗迷。訓迷錯也。昏迷不恭。訓迷惑也。政乃不迷。訓迷錯謬也。

乃言底可績。三邦底貢厥名。底慎財賦。乃底滅亡。我祖底遂陳于上。底天之罰。訓底致也。底商之罪。訓底

至也。

汝陟帝位。陟方乃死。陟禹之迹。訓陟升也。故殷禮陟配天。惟新陟王。訓陟升遐也。

在璿璣訓璣機也。玄纁璣組訓璣珠不圓者。

玉衡訓衡橫也不惠阿衡訓衡平也。

肆類于上帝訓肆遂也。肆台小子肆予小子發。肆予告我友邦君訓肆故也。肆王惟德用訓肆今也。眚災肆赦淫酗肆虐訓肆縱也。昏棄厥肆祀訓肆墮也。肆哉訓肆放也。肆汝小子封訓肆未詳。肆爾多士訓肆與肆汝小子封同。肆其監于茲訓肆大也。

禋于六宗則禋于文王武王訓禋精意以享也。

禋于六宗訓宗尊也。汝作秩宗訓宗祖廟也。悼宗將禮訓宗功宗之宗也。江漢朝宗訓夏見曰宗。望于山川訓望而祭之。故曰望。柴望秩于山川訓望望秩以祀山川。惟二月既望訓日月相望謂之望。輯五瑞訓輯斂輯寧爾邦家訓輯和。

班瑞于羣后訓班頒同。班師振旅訓班還。

敷奏以言訓敷陳。禹敷土訓敷分也。敬敷五教。篠蕩既敷。敷賁訓敷布。敷求哲人訓敷廣也。敷重蔑席訓敷設。

肇十有二州肇我邦于有夏訓肇始也。肇牽車牛訓肇敏。

封十有二山訓封表也。小子封訓封康叔名。

怙終賊刑訓終謂再犯。乃有大罪非終訓終故犯。

怙終賊刑。訓賊殺也。寇賊姦宄。訓殺人曰賊。

四罪而天下咸服。訓服者。天下皆服其用刑之當罪也。五刑有服。訓服。服其罪也。五百里甸服。先王有服。以常舊服。乃服。惟弘王遠服賈。訓服事也。說乃言惟服。訓服行也。嗣無疆大歷服。訓服。五服也。時乃大明服。訓服者。服其民也。

如喪考妣。訓喪爲之服也。剝喪元良。訓喪去也。

咨十有二牧。訓牧。養民之官。牧誓。訓牧地名。準夫牧。訓牧常伯也。

柔遠能邇。訓能者。擾而習之也。惟其能。訓官以任事。故曰能。推賢讓能。訓能有才者也。

惇德允元。訓德有德之人也。德惟治。訓德者合敬仁誠之稱也。德無常師。訓德者善之總稱。同力度德。訓

德者得也。行道而有得于心也。玩人喪德。訓德者己之所得。惟德惟義。訓德者心之理。

惇德允元。訓元。仁厚之人也。一人元良。訓元。大其惟王位在德元。訓元首也。

而難任人。訓難。拒絕也。其難其慎。訓難者難于任用。予告汝于難。訓難。言謀遷徙之難也。

亮采惠疇。惠迪吉。不惠阿衡。惠篤敍。胥保惠。訓惠順也。安民則惠。訓惠仁之愛也。雀弁執惠。訓惠三隅矛。

亮采惠疇。訓亮明一說。亮相也。亮采有邦。訓亮亦明也。亮陰。訓亮亦作諒。

惟時懋哉。時乃功。懋哉。懋遷有無化居。訓懋勉也。予懋乃德。訓懋懋古通用。懋。盛大之意。惟公懋德。訓懋

盛大之意。予懋乃德之懋。

汝后稷。皇后憑玉几。訓后君也。后式典集。訓后後王也。播時百穀。暨稷播種。訓播布播棄黎老。訓播放也。

五品不遜。乃汝盡遜。訓遜順也。惟學遜志。訓遜謙抑也。

汝作司徒。訓司徒掌教之官。牧誓訓司徒主民治徒庶之政令。洪範司徒掌教。所以成其性。

敬敷五教。訓敬敬其事也。敬哉有士。訓敬心無所慢也。先王惟時懋敬。訓敬即克敬惟親之敬。

蠻夷猾夏。訓夏明而大也。夏書訓夏禹有天下之號。

寇賊姦宄。訓劫人曰寇。司寇掌邦禁。訓羣行攻劫曰寇。

汝作士。訓士理官也。見士于周。訓士說文曰事也。

讓于夔龍。訓夔龍二臣名。山龍訓龍取其變也。

聲依永。訓聲者宮商角徵羽也。聲教訖于四海。訓聲謂風聲。振舉于此而遠者聞焉。故謂之聲。

三載考績。訓考核實也。考朕昭子刑。訓考成也。

分北三苗。訓北猶背也。比頑童。訓比昵也。曷不暨朕幼孫有比。訓比同事也。北如字。又音佩。

舜生三十徵庸。訓徵召也。明徵定保。八庶徵。訓徵驗。

文命。訓命教。用懌先王受命。訓命天命也。

后克艱厥后。奏庶艱食。訓艱難也。厥惟艱哉。訓艱者饑寒之艱。

嘉言罔攸伏。受王嘉師。訓嘉善。嘉靖般邦。訓嘉美。帝德廣運。訓廣者大而無外。齊聖廣淵。訓廣言其大。

乃聖乃神。訓自其大而化之。而言謂之聖。睿作聖。齊聖廣淵。訓聖無不通。惟聖罔念人之彥聖。訓聖通明。奄有四海。訓奄盡也。王來自奄。訓奄不知所在。

惠迪吉。訓迪道也。爾尙迪果毅。四人迪哲。訓迪蹈矧。今民罔迪。訓迪卽迪吉康之迪。不克終日。勸于帝之迪。訓迪啓迪也。

罔淫于樂。時謂淫風。則其無淫。訓淫過也。今惟淫舍牯牛馬。訓淫大也。

疑謀勿成。訓謀圖爲也。弗詢之謀。訓謀謂訂事。聽作謀。訓謀者度也。爾有嘉謀。訓言切于事。謂之謀。

四夷來王。訓九州之外。世一見曰王。王若曰孟侯。訓王武王也。王若曰嗚呼君牙。訓王穆王也。以爲天下王。訓謂之王者。指其君長而言。

九功惟敘。訓敘者言九者各順其理。而不汨陳以亂其常也。天敘有典。訓敘者君臣父子兄弟夫婦朋友之倫。敘也。各以其敘。訓敘者應節候也。誕敢紀其敘。訓敘緒。篤敘乃正父。訓敘者先後之不紊。乃承敘萬年。訓敘教條次第也。

九敘惟歌。訓歌者以九功之敘而詠之歌也。帝庸作歌。訓歌詩歌也。

董之用威。自我民明威。訓威古文作畏。威侮五行。訓威暴殄之也。威克厥愛。訓威者嚴明之謂。自亂于威。

儀訓威者有威可畏非訖于威訓威權勢也

六府訓六者財用之所自出故曰府惟府辜功訓府聚也

三事訓三者人事之所當爲故曰事故一人有事訓事征伐會同之類作三事訓以職言故曰事

耄期倦于勤訓九十曰耄百年耄荒訓耄老而昏亂之稱

耄期訓百年日期期于予治訓期先事取必之謂

皐陶邁種德訓邁勇往力行之意予惟克邁乃訓邁行也

念茲在茲訓茲指皐陶也嗣王其監于茲君肆其監于茲訓茲者指上文而言邇可遠在茲允懷于茲茲

惟后矣訓茲者此也

罔或于予正訓干犯舞干羽于兩階比爾于訓干楯

以弼五教訓弼輔也承弼厥辟訓弼者正救之也

臨下以簡訓簡者不煩之謂簡賢附勢訓簡略也惟簡在上帝之心訓簡閱也克以爾多方簡訓簡擇也

五辭簡孚訓簡核其實也簡恤爾都訓簡者簡閱其士

罰弗及嗣訓嗣子孫嗣爾股肱訓嗣續

賞延于世訓延遠及也延入翼室訓延引也

賞延于世訓世嗣皆謂子孫用殄厥世訓世者世堯之天下也世選爾勞訓世非一世也官人以世訓世

子弟也。世變風移。訓父子曰世。

宥過無大。訓過者不識而誤犯也。過九江。訓過經過也。又東過漆沮。訓既得澧。涇涇愈大。漆沮皆小。故曰過。百姓有過。訓過廣韻曰責也。正于五過。訓過誤也。與其殺不辜。訓辜罪也。亦罔非酒惟辜。訓喪邦。故言辜。寧失不經。訓經常也。論道經邦。訓經者經綸之謂。

天之歷數。訓歷數者帝王相繼之次第。猶歲時氣節之先後。五曰歷數。訓歷數者占步之法。所以紀歲月星辰也。

無稽之言。訓言謂泛言。嘉言孔彰。訓言謂其訓。

惟口出好與戎。訓戎兵也。乃不畏戎毒于遠邇。訓戎大。

禹乃會羣后。訓會徵會也。作會。訓會者繪也。漚沮會同。訓會者水之合也。東會于澧。又東會于涇。訓澧涇大與漚竝。故曰會。會其有極。訓會者合而來也。用會紹乃辟。訓會者合之而使不離。

日號泣于旻天。訓仁覆閔下謂之旻。旻天大降喪于殷。訓旻秋天也。主肅殺而言。至誠感神。訓誠感物曰誠。其不能誠于小民。訓誠和。

慎厥身修。訓慎者言不可不致其謹也。其難其慎。訓慎者慎于聽察。

孔壬六府孔修。訓孔大也。九江孔殷。嘉言孔彰。訓孔甚也。

亂而敬。茲予有亂政同位。殷其弗或亂。正四方。四方迪亂。亂爲四方。亂爾有政。自亂于威儀。其能而亂四方。民之治亂。訓亂治也。予有亂臣十人。惟以亂民。訓治亂曰亂。亂于河。訓絕河而渡曰亂。時謂亂風。訓倒置悖理曰亂。

擾而毅。擾兆民。訓擾。訓也。俶擾天紀。訓擾。亂也。

寬而栗。訓而轉語辭也。其能而亂四方。訓而如也。

百僚師師。訓師師。相師法也。我有師師。訓師師。以官師爲師也。

無教逸欲有邦。訓教非必教令。謂上行而下效也。聲教訖于四海。訓教。謂教化。

一日二日萬幾。訓幾。微也。惟幾。訓幾。事之微也。貢于非幾。訓幾者。動之微。而善惡之所由分也。

勅我五典。訓勅。正。勅天之命。惟民其勅懋和。訓勅。戒勅也。

同寅協恭和衷哉。訓衷。降衷之衷。卽所謂典禮也。降衷于下民。訓衷。中。

五服五章。訓五服。五等之服。弼成五服。訓五服。甸侯綏要荒也。五服一朝。訓五服。侯甸男采衛也。

天明畏。訓畏者。威其惡。雖畏勿畏。訓畏。威古通用。威辟之也。

距四海。訓距。至。不距朕行。訓距。違也。

安汝止。訓止者。心之所止也。爾乃尙寧幹止。訓止。居也。

惟幾惟康。訓惟幾。所以審其事之發。惟時惟幾。訓惟幾者。無事而不戒勅也。

臣哉訓。臣以人言。臣妾逋逃。訓。男曰臣。

鄰哉訓。鄰左右輔弼也。郭鄰訓。周禮六遂五家爲鄰。

予欲左右有民訓。左右者輔翼也。左右惟其人訓。左右者輔弼大臣。

黼黻訓。黼若黼斧形。黼純訓。黼白黑雜繪。

絺繡訓。絺鄭氏讀作滌。絜也。厥貢鹽絺訓。絺細葛也。

予違汝弼訓。違戾也。罔尤違訓。違背也。違之俾不違訓。違背違之也。

格則承之訓。承薦也。罔不惟民之承訓。承敬也。乃承敝萬年訓。承聽受也。承弼厥辟訓。承承順之謂。

無若丹朱訓。丹朱之國名也。礪砥礪丹訓。丹丹砂也。

辛壬癸甲訓。四日也。甲于內亂訓。甲始也。

惟荒度土功訓。荒大也。荒服訓。以其荒野故謂之荒服。內作色荒訓。荒者迷亂之謂。非予自荒茲德無荒。

失朕命訓。荒廢也。百年耄荒訓。荒忽也。

憂擊訓。考擊也。不率大憂訓。憂法也。

搏拊訓。拊循也。擊石拊石訓。輕擊曰拊。

下管鼗鼓訓。管猶周禮所謂陰竹之管。致辟管叔訓。管國。

予擊石訓。石磬也。關石和鈞訓。百二十斤爲石。

庶尹允諧訓尹正也。伊尹訓尹字也。尹茲東夏訓尹治也。尹旅訓尹正官之長。阪尹訓古者險危之地。封疆之守或不以封而使王官治之是之謂尹。

率作興事訓率總率也。于其子孫弗率率乃祖考攸行俾率先王率自中率惟教功訓率循也。皐陶拜手稽首訓拜手稽首者首至手又至地也。周公拜手稽首訓拜手稽首者周公遣使之禮也。禹貢訓下之所供謂之貢厥貢漆絲訓貢者下獻其土所有于上也。爾無以釗冒貢訓貢進也。既修太原訓修因繇之功而修之也。簡厥修訓修謂其職業。

浮于濟潔訓舟行水曰浮鮮以不浮于天時訓浮之言勝也。惟受罪浮于桀訓浮過。

灘沮會同訓同者合而一也。澧水攸同訓同者同于渭也。上宗奉同瑁訓同爵名。海濱廣斥訓濱涯也。泗濱訓濱水旁也。

嵎夷既略訓略經略爲之封畛以遏亂略訓略謀略也。

草木漸包訓包叢生也。厥包橘柚訓包裹也。

厲砥礮丹訓礪以麤糲爲稱礪乃鋒刃訓礪磨也。

蔡蒙旅平訓祭山曰旅。亞旅訓旅衆也。尹旅訓旅衆大夫也。

蔡蒙訓二山名。二百里蔡訓蔡放也。蔡仲之命訓蔡國名。

涇屬渭汭訓屬連屬也。墨罰之屬訓屬類也。

弱水既西訓。西海之山有水焉。散渙無力。不能負芥。故名曰弱。無弱孤訓。弱者少之也。六曰弱訓。弱者柔之過也。

威則三壤訓。則品節之也。有典有則訓。則猶周之八則。則其無淫。時人不則有愆訓。則法也。式和民則訓。則有物有則之則。

五百里甸服訓。甸。俊民甸四方訓。甸。治也。奄甸萬姓訓。甸者。井牧其地。什伍其民也。

五百里綏服。克綏厥猷訓。綏。安也。我先后綏乃祖乃父訓。綏。懷來之意。

甘誓訓。甘地名。甘酒嗜音訓。甘嗜皆無厭也。

威。肅五行訓。侮。輕忽之也。取亂侮亡訓。侮。說文曰傷也。

有窮后羿訓。窮。國名。終以困窮訓。窮。困之極也。

御其母以從訓。御。侍也。其侍御僕從訓。御。車御之官。御王冊命訓。凡王所臨所服用皆曰御。

逸豫滅厥德訓。豫。樂也。豫恆燠若訓。豫。怠。

皇祖有訓。惟皇上帝。皇后憑玉几。張皇六師訓。皇。大。皇建其有極訓。皇。君。無皇曰我皇多有之訓。皇。王。通。

子視天下訓。子。五子自謂也。萬姓仇予訓。仇。予之予。指太康也。

亂其紀綱訓。小者爲紀。既歷三紀訓。十二年曰紀。

峻宇雕牆訓。雕。繪飾也。雕玉仍几訓。雕。刻鏤也。

和鈞訓和平也。惟和惟一訓和者。可否相濟。和恆四方。訓和者。使不乖也。和之弓。訓和古之巧工。明徵定保。昔先正保衡。保釐東郊。訓保安也。保受王威命。訓保者保而弗失。公明保予冲子。訓保保佑之也。太保訓保者保其身體。

官師相規。畔官訓官以職言。惟官訓官威勢也。官伯族姓。訓官典獄之官也。畔官離次。訓次位也。王次于河朔。訓次止也。勿庸以次汝封。訓汝次舍之次。弗集于房。訓集漢書作輯。集輯通用。后式典集。訓集和輯也。不集于享。訓集萃也。奉將天罰。訓將行也。惇宗將禮。迪將其後。訓將大也。

天吏逸德。罔有逸言。訓逸過。上帝引逸。訓逸安也。拙謀作乃逸。訓逸過失也。逸祝冊。訓逸史佚也。奉若天命。訓天者典常之所自出。矯誣上天。訓天以形體言。天乃錫禹。訓天以理言也。宏于天。訓天者理之所從出。有若伊尹。格于皇天。訓自其徧覆言之。謂之天。

式商受命。惟說式克欽承。式爾后式典集。天惟式教我。訓式用也。式敷民德。訓式敬也。萬邦作式。嚴惟不式。子孫。訓其成式。訓式法也。式商容閔。訓式車前橫木有所敬。則俯而憑之。

用爽厥師。昧爽丕顯。時甲子。昧爽。爽邦由哲。訓爽明。故有爽德。訓爽失也。乃葛伯。訓伯爵也。越庶伯君子。訓伯長也。官伯族姓。訓伯諸侯也。

后來其蘇。訓蘇更生也。蘇公。訓蘇國名。

不殖貨利。訓殖聚也。兆民允殖。訓殖生也。

以義制事。訓義者心之裁制。典厥義。訓義者理之當然。行而宜之之謂。同德度義。訓義宜也。制事達時之宜也。王義嗣德。用其義刑。訓義宜也。惟德惟義。訓義者理之宜也。

以禮制心。訓禮者理之節文。縱敗禮。訓禮就身言之也。修其禮物。訓禮典禮。

克綏厥猷。爾惟踐修厥猷。訓猷道也。汝猷黜乃心。告君乃猷裕。訓猷謀。凡厥庶民有猷。訓有猷。有謀慮者。

王若曰。猷。訓猷。發語辭。爾有嘉謀嘉猷。訓言合于道。謂之猷。

敢昭告于上天神后。訓神后。后土也。予念我先神后。訓神后。先王也。

上天孚佑下民。作周孚先。訓孚。信。五辭簡孚。訓孚。無可疑也。

天命弗僭。惟吉凶。不僭曰僭。恆。惕。若。訓僭。差也。民用僭忒。訓僭。踰也。

賁若草木。訓賁。文之著也。敷賁。訓賁。飾也。用宏茲賁。訓宏。賁。皆大也。

茲朕未知獲戾于上下。速戾于厥躬。訓戾。罪。未戾厥心。訓戾。止也。無遠弗戾。訓戾。至也。

無從匪彝。訓彝。法。我不知其彝。倫攸斁。無彝。酒。訓彝。常。

伊尹祠于先王。訓先王。湯也。惟先王建邦。訓先王。后稷。先王既勤用。訓先王。文王武王也。

總已以聽冢宰。訓冢宰。長也。冢宰掌邦治。訓冢。大。

伊尹。訓伊尹。字也。祖伊。訓祖。姓。伊。名。

立愛惟親。訓立植也。立太師太傅。訓立始辭也。三公非始于此。立爲周家定制。則始于此也。

三風訓。風風化也。時乃風。訓風風教也。

其刑墨。訓墨墨刑也。墨辟疑赦。訓墨刻類而涅之也。

具訓于蒙士。訓具計悉也。具乃貝玉。訓具多取而兼有之謂。

自周有終。訓周忠信也。雖有周親。訓周至也。周書訓周文王國號。王朝步自周。訓周鎬京也。

先王味爽。訓味晦時甲子爽。訓味冥。

丕顯訓顯。亦明也。惟良顯哉。訓顯以名言。

往省括于度。訓度法度。欲敗度。訓度就事言之也。

伊尹以冕服奉鬮王。訓冕冠也。冕執鉞。訓冕大夫服。

伊尹以冕服奉鬮王。訓奉迎也。乃奉其恫。訓奉承。

弗慮胡獲。訓胡何也。小子胡。訓胡仲名。

一人元良。訓一人者。萬邦之儀表。能念予一人。訓一人武王也。

一人元良。訓元大良善。剝喪元良。訓元良微子也。

一人元良。訓良善。惟良顯哉。訓良以德言。進厥良。訓良謂其行義。

萬邦以貞。厥賦貞。百度惟貞。訓貞正也。曰貞。訓內卦爲貞。我二人共貞。訓貞猶當也。

顧諟天之明命。訓。顧。常目在之也。顧命。訓。顧。還視也。

克享天心。訓。享。當也。有斯明享。訓。享。上享下之享。汝其敬識百辟享。訓。享。朝享也。不集于享。訓。享。享有之享。

惟和惟一。訓。一者。終始如一。協于克一。訓。一者。其本原統會者也。

主善爲師。訓。善者德之實行。慮善以動。訓。善者當乎理也。

民不適有居。訓。適。往。乃惟膏災適爾。訓。適。偶也。

重我民。無盡劉。咸劉厥敵。訓。劉。殺也。一人冕執劉。訓。劉。鉞屬。

若顛木之有由蘖。訓。由。古文作𣎵。木生條也。弔由靈。訓。由。用也。別求聞由。訓。由。行。

王若曰。格汝衆。訓。若。曰。者。非盡當時之言。大意若此也。周公若曰。拜手。訓。此篇周公所作。而記之者。周史也。故稱若曰。

相時儉民。訓。相。視也。予其懋簡相爾。訓。相。爾雅曰。導也。

儉民。訓。小民也。立政用儉人。訓。謂之儉者。形容其沾沾便捷之狀也。

用罪伐厥死。訓。伐。猶誅也。四伐五伐。訓。伐。擊刺也。

予敢動用非罰。訓。敢。不敢也。敢恭生。訓。敢。勇也。敢對揚天子。訓。敢者。自信無慊之辭。

誕告用亶。訓。亶。誠也。亶聰明。訓。亶者。誠實無妄之謂。

予丕克羞爾。爾尙克羞饋祀。訓。羞。養也。我旣羞告爾。使羞其行。訓。羞。進也。

陳于茲。訓。陳。久也。我祖底遂。陳于上。汨。陳其五行。訓。陳。列也。

各設中于乃心。訓。中者。極至之理。惟爾之中。訓。中者。民則之體。而人之所同然也。率自中。訓。中者。心之理。

而無過不及之差者也。

歷告爾百姓于朕志。訓。歷。盡也。嗣無疆大歷服。訓。歷。歷數也。

弔由靈。訓。弔。至。無敢不弔。訓。弔。精至也。大誥弗弔。訓。弔。恤也。

以匡乃辟。訓。匡。正。匡其不及。訓。匡。輔助也。

敢對揚天子訓。對者。對以己。對揚文武之光命。訓。對。答。

民中絕命。訓。言民而不言君者。不敢斥也。惟民自速辜。訓。曰。民者。猶曰。先民。君臣之通稱也。

天旣訖我般命。訓。訖。絕也。非訖于威。民訖自若是。多盤。訓。訖。盡也。

我用沈酗。訓。言我而不言紂者。過則歸己。我其立政。訓。我者。指王而言。

微子訓。微。國名。繫微。訓。繫微在巴蜀。

微子箕子訓。子。爵也。朕復子明辟。考朕昭子刑。訓。子。親之。

越我御事。庶士。越厥疆土于先王。訓。越。及也。殺越人于貨。訓。越。顛越也。

越我御事。訓。御事。治事者。越自乃御事。訓。不敢指言成王。謂之御事。猶今稱人爲執事也。

受有臣億萬訓。百萬曰億。公其以予萬億年。訓。十萬曰億。郊社不修。訓。郊。所以祭天。丁巳。用牲于郊。訓。郊。祭天地也。王出郊。魯人三郊三遂。訓。國外曰郊。今商王受。訓。受。紂名也。保受王威命。訓。受者。受而無拒。相我受民。訓。民而謂之受者。言民者。受之于天。受之于祖宗。

惟于小子無良。訓。無良。猶言無善也。惟于一人無良。訓。無良。言其質之不善也。

牧誓訓司空。主土治壘。辟以營軍。洪範訓司空。掌土。所以安其居。

牧誓師氏。訓。以兵守門者。顧命師氏。訓。大夫官。

徵盧。訓。盧。彭在西北。盧弓一。訓。盧。黑也。

乃止齊焉。訓。齊。齊整也。克齊聖廣淵。訓。齊。肅也。

恭天受命。訓。成命。黜商之定命也。王厥有成命。訓。成命。天之成命也。

彝倫攸斃。訓。斃。俾我有周無斃。訓。斃。厭也。

貌曰恭。訓。恭者。敬也。嚴恭寅畏。訓。恭則謙抑。

一曰歲。訓。歲者。序四時也。烝祭歲。訓。曰歲云者。歲舉之祭也。

畏高明。訓。高明。位之尊顯者也。高明柔克。訓。高明。高亢明爽。過乎中者也。

既富方穀。訓。富。祿之也。二曰富。訓。富者。有廩祿也。惟訖于富。訓。富。賄賂也。

無反無側。訓反。倍常也。弗惟反。訓反者。令出不可行而變逆之謂。惟反。訓反。報德怨也。

無反無側。訓側。不正也。便辟側媚。訓側者。姦邪。

彊弗友。訓友。順。乃有友。謂厥子。訓友。以喻四國。

作內吉。訓內。謂祭祀等事。惟內。訓內。女謁也。

二曰疾。訓疾。身不安。疾大漸。訓統言曰疾。

志以道寧。訓道者。所當由之理也。論道經邦。訓道者。陰陽之理。恆而不變者也。同底于道。訓道者。致治之

道也。

穆卜。訓敬而有和意。乃穆考文王。訓穆。敬也。

公曰體。訓體。兆之體也。辭尙體要。訓趣。完具而已之謂體。

公將不利于孺子。訓孺子。成王也。孺子其朋。訓孺子。稚子也。

大語弗弔。訓猶。詩言不弔。昊天之日。言我不爲天所恤。多士弗弔。訓弗弔。未詳。意其爲歎憫之辭。當時方

言爾也。

已。予惟小子。訓已。承上語辭。已而有不能已之意。已。汝惟小子。訓已。語辭之不能已也。已若茲監。訓已。語

辭。

殷小腆。訓腆。厚。洗腆。致用酒。訓腆。以致其厚。

我有大事休訓。休美也。雖休勿休。訓休省之也。

闕愆我成功所訓。愆者艱難而不易。厥誥愆庶邦庶士。訓愆戒謹也。

肆予大化誘我友邦君。訓化者化其固滯。貳公宏化。訓化者天地之化。運而無迹者也。

修其禮物。訓物文物也。儀不及物。訓物幣也。

篤不忘。訓篤厚也。篤敍乃正父。訓篤者篤厚而不忘。

宏于天。訓宏者廓而大之也。貳公宏化。訓宏者張而大之。

汝陳時臬。訓臬法也。爾罔不克臬。訓臬事也。

已汝惟小子。訓小子幼小之稱。文王誥教小子。訓小子少子之稱。小子同未。在位。訓小子成王也。在今子

小子且。訓小子自謙之辭也。

康誥迪。屢訓迪之者。雖屢多方。迪屢訓屢蹈。

純其藝。惟天不畀純。侵戎我國家。純訓純大也。黼純訓純緣也。

爾乃自介。訓介助也。爾曷不夾介。訓介賓介之介。太保承介。訓介大也。如有一介臣。訓介獨也。

子其殺。訓其者未定辭也。曷其奈何。勿敬。訓其語辭。其不能誠于小民。上下勤恤。其曰。訓其期之辭也。則

其無淫。訓其指文王而言。

汝若恆越。訓恆常也。和恆四方。訓恆者使可久也。政貴有恆。訓對暫之謂恆。

王啓監訓。監三監之監。若茲監訓。監視也。奔走臣我監訓。監洛邑之遷民者也。

懷爲夾訓。夾近也。爾曷不夾介訓。夾輔之夾。

惟三月哉生魄。訓三月。周公攝政七年之三月也。惟三月。周公初于新邑洛。訓三月。成王祀洛次年之三月也。

面稽天若。訓面鄉也。大輅在賓階面。訓面南嚮也。

王敬作所。訓所處所也。所其無逸。訓所猶處所也。

佻來以圖。訓圖路之地圖也。洪惟圖天之命。訓圖謀也。

享多儀。訓儀禮。自亂于威儀。訓儀者有儀可象。

王命予來。訓來洛邑也。惟來。訓來于請也。

乃單文祖德。訓單。彈也。不單稱德。訓單盡也。

乃非民攸訓。訓法。猶胥訓告。訓誠子孫。訓其成式。訓訓順。

不克聞于民之麗。訓麗。猶日月麗于天之麗。謂民之所依以生者也。依于土。依于衣食之類。奠麗陳教。訓

麗。依也。匪察于獄之麗。訓麗。附也。

爾乃尙寧幹止。訓幹。事。峙乃楨幹。訓旁曰幹。

爾尙不忌于凶德。訓忌。畏也。未就予忌。訓忌。疾。

麻冕彤裳。訓彤、纁也。彤弓一訓彤、赤。
畢公衛侯訓畢、衛、毛皆國名。畢協賞訓訓、畢、盡。